

NUMERI

Capitulum: 1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36

CAPITULUM 1

Ilocutusque est Dominus ad Mosen in deserto Sinai in tabernaculo foederis prima die mensis secundi anno altero egressionis eorum ex Aegypto dicens

2 tollite summam universae congregationis filiorum Israhel per cognationes et domos suas et nomina singulorum quicquid sexus est masculini

3 a vicesimo anno et supra omnium virorum fortium ex Israhel et numerabitis eos per turmas suas tu et Aaron

4 eruntque vobiscum principes tribuum ac domorum in cognationibus suis

5 quorum ista sunt nomina de Ruben Elisur filius Sedeur

6 de Symeon Salamihel filius Surisaddai

7 de Iuda Naasson filius Aminadab

8 de Isachar Nathanahel filius Suar

9 de Zabulon Heliab filius Helon

10 filiorum autem Ioseph de Ephraim Helisama filius Ammiud de Manasse Gamalihel filius Phadassur

11 de Benjamin Abidan filius Gedeonis

12 de Dan Ahiezer filius Amisaddai

13 de Aser Phegihel filius Ochran

14 de Gad Heliasaph filius Duhel

15 de Nepthali Ahira filius Henan

16 hii nobilissimi principes multitudinis per tribus et cognationes suas et capita exercitus Israhel

17 quos tulerunt Moses et Aaron cum omni vulgi multitudine

18 et congregaverunt primo die mensis secundi recensentes eos per cognationes et domos ac familias et capita et nomina singulorum a vicesimo anno et supra

19 sicut praeceperat Dominus Mosi numeratique sunt in deserto Sinai

20 de Ruben primogenito Israhelis per generationes et familias ac domos suas et nomina capitum singulorum omne quod sexus est masculini a vicesimo anno et supra procedentium ad bellum

21 quadraginta sex milia quingenti

22 de filiis Symeon per generationes et familias ac domos cognationum suarum recensiti

sunt per nomina et capita singulorum omne quod sexus est masculini a vicesimo anno et supra procedentium ad bellum

23 quinquaginta novem milia trecenti

24 de filiis Gad per generationes et familias ac domos cognationum suarum recensiti sunt per nomina singulorum a viginti annis et supra omnes qui ad bella procederent

25 quadraginta quinque milia sescenti quinquaginta

26 de filiis Iuda per generationes et familias ac domos cognationum suarum per nomina singulorum a vicesimo anno et supra omnes qui poterant ad bella procedere

27 recensiti sunt septuaginta quattuor milia sescenti

28 de filiis Isachar per generationes et familias ac domos cognationum suarum per nomina singulorum a vicesimo anno et supra omnes qui ad bella procederent

29 recensiti sunt quinquaginta quattuor milia quadringenti

30 de filiis Zabulon per generationes et familias ac domos cognationum suarum recensiti sunt per nomina singulorum a vicesimo anno et supra omnes qui poterant ad bella procedere

31 quinquaginta septem milia quadringenti

32 de filiis Ioseph filiorum Ephraim per generationes et familias ac domos cognationum suarum recensiti sunt per nomina singulorum a vicesimo anno et supra omnes qui poterant ad bella procedere

33 quadraginta milia quingenti

34 porro filiorum Manasse per generationes et familias ac domos cognationum suarum recensiti sunt per nomina singulorum a viginti annis et supra omnes qui poterant ad bella procedere

35 triginta duo milia ducenti

36 de filiis Benjamin per generationes et familias ac domos cognationum suarum recensiti sunt nominibus singulorum a vicesimo anno et supra omnes qui poterant ad bella procedere

37 triginta quinque milia quadringenti

38 de filiis Dan per generationes et familias ac domos cognationum suarum recensiti sunt nominibus singulorum a vicesimo anno et supra omnes qui poterant ad bella procedere

39 sexaginta duo milia septingenti

40 de filiis Aser per generationes et familias ac domos cognationum suarum recensiti sunt per nomina singulorum a vicesimo anno et supra omnes qui poterant ad bella procedere

41 quadraginta milia et mille quingenti

42 de filiis Nepthali per generationes et familias ac domos cognationum suarum recensiti sunt nominibus singulorum a vicesimo anno et supra omnes qui poterant ad bella procedere

43 quinquaginta tria milia quadringenti

44 hii sunt quos numeraverunt Moses et Aaron et duodecim principes Israhel singulos per domos cognationum suarum

45 fueruntque omnes filiorum Israhel per domos et familias suas a vicesimo anno et supra qui poterant ad bella procedere

46 sescenta tria milia virorum quingenti quinquaginta

47 Levitae autem in tribu familiarum suarum non sunt numerati cum eis

48 locutusque est Dominus ad Mosen dicens

49 tribum Levi noli numerare neque ponas summam eorum cum filiis Israhel

- ⁵⁰ sed constitue eos super tabernaculum testimonii cuncta vasa eius et quicquid ad caerimonias pertinet ipsi portabunt tabernaculum et omnia utensilia eius et erunt in ministerio ac per gyrum tabernaculi metabuntur
- ⁵¹ cum proficiscendum fuerit deponent Levitae tabernaculum cum castra metanda erigent quisquis externorum accesserit occidetur
- ⁵² metabuntur autem castra filii Israhel unusquisque per turmas et cuneos atque exercitum suum
- ⁵³ porro Levitae per gyrum tabernaculi figent tentoria ne fiat indignatio super multitudinem filiorum Israhel et excubabunt in custodiis tabernaculi testimonii
- ⁵⁴ fecerunt ergo filii Israhel iuxta omnia quae praeceperat Dominus Mosi

CAPITULUM 2

- I**locutusque est Dominus ad Mosen et Aaron dicens
- ² singuli per turmas signa atque vexilla et domos cognationum suarum castrametabuntur filiorum Israhel per gyrum tabernaculi foederis
- ³ ad orientem Iudas figet tentoria per turmas exercitus sui eritque princeps filiorum eius Naasson filius Aminadab
- ⁴ et omnis de stirpe eius summa pugnantium septuaginta quattuor milia sescentorum
- ⁵ iuxta eum castrametati sunt de tribu Isachar quorum princeps fuit Nathanahel filius Suar
- ⁶ et omnis numerus pugnatorum eius quinquaginta quattuor milia quadringenti
- ⁷ in tribu Zabulon princeps fuit Heliab filius Helon
- ⁸ omnis de stirpe eius exercitus pugnatorum quinquaginta septem milia quadringenti
- ⁹ universi qui in castris Iudae adnumerati sunt fuerunt centum octoginta sex milia quadringenti et per turmas suas primi egredientur
- ¹⁰ in castris filiorum Ruben ad meridianam plagam erit princeps Elisur filius Sedeur
- ¹¹ et cunctus exercitus pugnatorum eius qui numerati sunt quadraginta sex milia quingenti
- ¹² iuxta eum castrametati sunt de tribu Symeon quorum princeps fuit Salamihel filius Surisaddai
- ¹³ et cunctus exercitus pugnatorum eius qui numerati sunt quinquaginta novem milia trecenti
- ¹⁴ in tribu Gad princeps fuit Heliasaph filius Duhel
- ¹⁵ et cunctus exercitus pugnatorum eius qui numerati sunt quadraginta quinque milia sescenti quinquaginta
- ¹⁶ omnes qui recensiti sunt in castris Ruben centum quinquaginta milia et mille quadringenti quinquaginta per turmas suas in secundo loco proficiscentur
- ¹⁷ levabitur autem tabernaculum testimonii per officia Levitarum et turmas eorum quomodo erigetur ita et deponetur singuli per loca et ordines suos proficiscentur
- ¹⁸ ad occidentalem plagam erunt castra filiorum Ephraim quorum princeps fuit Helisama filius Ammiud
- ¹⁹ cunctus exercitus pugnatorum eius qui numerati sunt quadraginta milia quingenti
- ²⁰ et cum eis tribus filiorum Manasse quorum princeps fuit Gamalihel filius Phadassur
- ²¹ cunctus exercitus pugnatorum eius qui numerati sunt triginta duo milia ducenti
- ²² in tribu filiorum Benjamin princeps fuit Abidan filius Gedeonis
- ²³ et cunctus exercitus pugnatorum eius qui recensiti sunt triginta quinque milia

quadringenti

²⁴ omnes qui numerati sunt in castris Ephraim centum octo milia centum per turmas suas tertii proficiscentur

²⁵ ad aquilonis partem castrametati sunt filii Dan quorum princeps fuit Ahiezer filius Amisaddai

²⁶ cunctus exercitus pugnatorum eius qui numerati sunt sexaginta duo milia septingenti

²⁷ iuxta eum fixere tentoria de tribu Aser quorum princeps fuit Phegihel filius Ochrán

²⁸ cunctus exercitus pugnatorum eius qui numerati sunt quadraginta milia et mille quingenti

²⁹ de tribu filiorum Nephtalim princeps fuit Ahira filius Henan

³⁰ cunctus exercitus pugnatorum eius quinquaginta tria milia quadringenti

³¹ omnes qui numerati sunt in castris Dan fuerunt centum quinquaginta septem milia sescenti et novissimi proficiscentur

³² hic numerus filiorum Israhel per domos cognationum suarum et turmas divisi exercitus sescenta tria milia quingenti quinquaginta

³³ Levitae autem non sunt numerati inter filios Israhel sic enim praecepit Dominus Mosi

³⁴ feceruntque filii Israhel iuxta omnia quae mandaverat Dominus castrametati sunt per turmas suas et profecti per familias ac domos patrum suorum

CAPITULUM 3

haec sunt generationes Aaron et Mosi in die qua locutus est Dominus ad Mosen in monte Sinai

² et haec nomina filiorum Aaron primogenitus eius Nadab dein Abiu et Eleazar et Ithamar

³ haec nomina filiorum Aaron sacerdotum qui uncti sunt et quorum repletae et consecratae manus ut sacerdotio fungerentur

⁴ mortui sunt Nadab et Abiu cum offerrent ignem alienum in conspectu Domini in deserto Sinai absque liberis functique sunt sacerdotio Eleazar et Ithamar coram Aaron patre suo

⁵ locutus est Dominus ad Mosen dicens

⁶ adplica tribum Levi et fac stare in conspectu Aaron sacerdotis ut ministrent ei et excubent

⁷ et observent quicquid ad cultum pertinet multitudinis coram tabernaculo testimonii

⁸ et custodiant vasa tabernaculi servientes in ministerio eius

⁹ dabisque dono Levitas

¹⁰ Aaron et filiis eius quibus traditi sunt a filiis Israhel Aaron autem et filios eius constitues super cultum sacerdotii externus qui ad ministrandum accesserit morietur

¹¹ locutusque est Dominus ad Mosen dicens

¹² ego tuli Levitas a filiis Israhel pro omni primogenito qui aperit vulvam in filiis Israhel eruntque Levitae mei

¹³ meum est enim omne primogenitum ex quo percussi primogenitos in terra Aegypti sanctificavi mihi quicquid primum nascitur in Israhel ab homine usque ad pecus mei sunt ego Dominus

¹⁴ locutus est Dominus ad Mosen in deserto Sinai dicens

¹⁵ numera filios Levi per domos patrum suorum et familias omnem masculum ab uno mense et supra

16 numeravit Moses ut praeceperat Dominus
17 et inventi sunt filii Levi per nomina sua Gerson et Caath et Merari
18 filii Gerson Lebni et Semei
19 filii Caath Amram et Iessaar Hebron et Ozihel
20 filii Merari Mooli et Musi
21 de Gerson fuere familiae duae lebnitica et semeitica
22 quarum numeratus est populus sexus masculini ab uno mense et supra septem milia quingentorum
23 hii post tabernaculum metabuntur ad occidentem
24 sub principe Eliasaph filio Lahel
25 et habebunt excubias in tabernaculo foederis
26 ipsum tabernaculum et operimentum eius tentorium quod trahitur ante fores tecti foederis et cortinas atrii tentorium quoque quod adpenditur in introitu atrii tabernaculi et quicquid ad ritum altaris pertinet funes tabernaculi et omnia utensilia eius
27 cognatio Caath habebit populos Amramitas et Iessaaritas et Hebronitas et Ozihelitas hae sunt familiae Caathitarum recensitae per nomina sua
28 omnes generis masculini ab uno mense et supra octo milia sescenti habebunt excubias sanctuarii
29 et castrametabuntur ad meridianam plagam
30 princepsque eorum erit Elisaphan filius Ozihel
31 et custodient arcam mensamque et candelabrum altaria et vasa sanctuarii in quibus ministratur et velum cunctamque huiuscemodi supellectilem
32 princeps autem principum Levitarum Eleazar filius Aaron sacerdotis erit super excubitores custodiae sanctuarii
33 at vero de Merari erunt populi Moolitae et Musitae recensiti per nomina sua
34 omnes generis masculini ab uno mense et supra sex milia ducenti
35 princeps eorum Surihel filius Abiahiel in plaga septentrionali castrametabuntur
36 erunt sub custodia eorum tabulae tabernaculi et vectes et columnae ac bases earum et omnia quae ad cultum huiuscemodi pertinent
37 columnaeque atrii per circuitum cum basibus suis et paxilli cum funibus
38 castrametabuntur ante tabernaculum foederis id est ad orientalem plagam Moses et Aaron cum filiis suis habentes custodiam sanctuarii in medio filiorum Israhel quisquis alienus accesserit morietur
39 omnes Levitae quos numeraverunt Moses et Aaron iuxta praeceptum Domini per familias suas in genere masculino a mense uno et supra fuerunt viginti duo milia
40 et ait Dominus ad Mosen numera primogenitos sexus masculini de filiis Israhel a mense uno et supra et habebis summam eorum
41 tollesque Levitas mihi pro omni primogenito filiorum Israhel ego sum Dominus et pecora eorum pro universis primogenitis pecoris filiorum Israhel
42 recensuit Moses sicut praeceperat Dominus primogenitos filiorum Israhel
43 et fuerunt masculi per nomina sua a mense uno et supra viginti duo milia ducenti septuaginta tres
44 locutusque est Dominus ad Mosen
45 tolle Levitas pro primogenitis filiorum Israhel et pecora Levitarum pro pecoribus eorum eruntque Levitae mei ego sum Dominus

- ⁴⁶ in pretio autem ducentorum septuaginta trium qui excedunt numerum Levitarum de primogenitis filiorum Israhel
- ⁴⁷ accipies quinque siclos per singula capita ad mensuram sanctuarii siclus habet obolos viginti
- ⁴⁸ dabisque pecuniam Aaron et filiis eius pretium eorum qui supra sunt
- ⁴⁹ tulit igitur Moses pecuniam eorum qui fuerant amplius et quos redemerant a Levitis
- ⁵⁰ pro primogenitis filiorum Israhel mille trecentorum sexaginta quinque siclorum iuxta pondus sanctuarii
- ⁵¹ et dedit eam Aaroni et filiis eius iuxta verbum quod praeceperat sibi Dominus

CAPITULUM 4

- I**locutusque est Dominus ad Mosen et Aaron dicens
- ² tolle summam filiorum Caath de medio Levitarum per domos et familias suas
- ³ a tricesimo anno et supra usque ad quinquagesimum annum omnium qui ingrediuntur ut stent et ministrent in tabernaculo foederis
- ⁴ hic est cultus filiorum Caath tabernaculum foederis et sanctum sanctorum
- ⁵ ingredientur Aaron et filii eius quando movenda sunt castra et deponent velum quod pendet ante fores involventque eo arcam testimonii
- ⁶ et operient rursum velamine ianthinarum pellium extendentque desuper pallium totum hyacinthinum et inducent vectes
- ⁷ mensam quoque propositionis involvent hyacinthino pallio et ponent cum ea turibula et mortariola cyatos et crateras ad liba fundenda panes semper in ea erunt
- ⁸ extendentque desuper pallium coccineum quod rursum operient velamento ianthinarum pellium et inducent vectes
- ⁹ sument et pallium hyacinthinum quo operient candelabrum cum lucernis et forcipibus suis et emunctoriis et cunctis vasis olei quae ad concinnandas lucernas necessaria sunt
- ¹⁰ et super omnia ponent operimentum ianthinarum pellium et inducent vectes
- ¹¹ nec non et altare aureum involvent hyacinthino vestimento et extendent desuper operimentum ianthinarum pellium inducentque vectes
- ¹² omnia vasa quibus ministratur in sanctuario involvent hyacinthino pallio et extendent desuper operimentum ianthinarum pellium inducentque vectes
- ¹³ sed et altare mundabunt cinere et involvent illud purpureo vestimento
- ¹⁴ ponentque cum eo omnia vasa quibus in ministerio eius utuntur id est ignium receptacula fuscinulas ac tridentes uncinos et vatilla cuncta vasa altaris operient simul velamine ianthinarum pellium et inducent vectes
- ¹⁵ cumque involverint Aaron et filii eius sanctuarium et omnia vasa eius in commotione castrorum tunc intrabunt filii Caath ut portent involuta et non tangant vasa sanctuarii ne moriantur ista sunt onera filiorum Caath in tabernaculo foederis
- ¹⁶ super quos erit Eleazar filius Aaron sacerdotis ad cuius pertinet curam oleum ad concinnandas lucernas et compositionis incensum et sacrificium quod semper offertur et oleum unctionis et quicquid ad cultum tabernaculi pertinet omniumque vasorum quae in sanctuario sunt
- ¹⁷ locutusque est Dominus ad Mosen et Aaron dicens
- ¹⁸ nolite perdere populum Caath de medio Levitarum

- 19 sed hoc facite eis ut vivant et non moriantur si tetigerint sancta sanctorum Aaron et filii eius intrabunt ipsique disponent opera singulorum et dividunt quid portare quis debeat
- 20 alii nulla curiositate videant quae sunt in sanctuario priusquam involvantur alioquin morientur
- 21 locutus est Dominus ad Mosen dicens
- 22 tolle summam etiam filiorum Gerson per domos ac familias et cognationes suas
- 23 a triginta annis et supra usque ad annos quinquaginta numera omnes qui ingrediuntur et ministrant in tabernaculo foederis
- 24 hoc est officium familiae Gersonitarum
- 25 ut portent cortinas tabernaculi et tectum foederis operimentum aliud et super omnia velamen ianthinum tentoriumque quod pendet in introitu foederis tabernaculi
- 26 cortinas atrii et velum in introitu quod est ante tabernaculum omnia quae ad altare pertinent funiculos et vasa ministerii
- 27 iubente Aaron et filiis eius portabunt filii Gerson et scient singuli cui debeant oneri mancipari
- 28 hic est cultus familiae Gersonitarum in tabernaculo foederis eruntque sub manu Ithamar filii Aaron sacerdotis
- 29 filios quoque Merari per familias et domos patrum suorum recensebis
- 30 a triginta annis et supra usque ad annos quinquaginta omnes qui ingrediuntur ad officium ministerii sui et cultum foederis testimonii
- 31 haec sunt onera eorum portabunt tabulas tabernaculi et vectes eius columnas et bases earum
- 32 columnas quoque atrii per circuitum cum basibus et paxillis et funibus suis omnia vasa et supellectilem ad numerum accipient sicque portabunt
- 33 hoc est officium familiae Meraritarum et ministerium in tabernaculo foederis eruntque sub manu Ithamar filii Aaron sacerdotis
- 34 recensuerunt igitur Moses et Aaron et principes synagogae filios Caath per cognationes et domos patrum suorum
- 35 a triginta annis et supra usque ad annum quinquagesimum omnes qui ingrediuntur ad ministerium tabernaculi foederis
- 36 et inventi sunt duo milia septingenti quinquaginta
- 37 hic est numerus populi Caath qui intrat tabernaculum foederis hos numeravit Moses et Aaron iuxta sermonem Domini per manum Mosi
- 38 numerati sunt et filii Gerson per cognationes et domos patrum suorum
- 39 a triginta annis et supra usque ad annum quinquagesimum omnes qui ingrediuntur ut ministrent in tabernaculo foederis
- 40 et inventi sunt duo milia sescenti triginta
- 41 hic est populus Gersonitarum quos numeraverunt Moses et Aaron iuxta verbum Domini
- 42 numerati sunt et filii Merari per cognationes et domos patrum suorum
- 43 a triginta annis et supra usque ad annum quinquagesimum omnes qui ingrediuntur ad explendos ritus tabernaculi foederis
- 44 et inventi sunt tria milia ducenti
- 45 hic est numerus filiorum Merari quos recensuerunt Moses et Aaron iuxta imperium Domini per manum Mosi
- 46 omnes qui recensiti sunt de Levitis et quos fecit ad nomen Moses et Aaron et principes

Israhel per cognationes et domos patrum suorum

⁴⁷ a triginta annis et supra usque ad annum quinquagesimum ingredienti ad ministerium tabernaculi et onera portanda

⁴⁸ fuerunt simul octo milia quingenti octoginta

⁴⁹ iuxta verbum Domini recensuit eos Moses unumquemque iuxta officium et onera sua sicut praeceperat ei Dominus

CAPITULUM 5

Locutusque est Dominus ad Moysen dicens

² praecipe filiis Israhel ut eiciant de castris omnem leprosum et qui semine fluit pollutusque est super mortuo

³ tam masculum quam feminam eicite de castris ne contaminent ea cum habitaverim vobiscum

⁴ feceruntque ita filii Israhel et eiecerunt eos extra castra sicut locutus erat Dominus Moysi

⁵ locutus est Dominus ad Moysen dicens

⁶ loquere ad filios Israhel vir sive mulier cum fecerint ex omnibus peccatis quae solent hominibus accidere et per negligentiam transgressi fuerint mandatum Domini atque deliquerint

⁷ confitebuntur peccatum suum et reddent ipsum caput quintamque partem desuper ei in quem peccaverint

⁸ sin autem non fuerit qui recipiat dabunt Domino et erit sacerdotis excepto ariete qui offertur pro expiatione ut sit placabilis hostia

⁹ omnes quoque primitiae quas offerunt filii Israhel ad sacerdotem pertinent

¹⁰ et quicquid in sanctuarium offertur a singulis et traditur manibus sacerdotis ipsius erit

¹¹ locutus est Dominus ad Moysen dicens

¹² loquere ad filios Israhel et dices ad eos vir cuius uxor erraverit maritumque contemnens

¹³ dormierit cum altero viro et hoc maritus deprehendere non quiverit sed latet adulterium et testibus argui non potest quia non est inventa in stupro

¹⁴ si spiritus zelotypiae concitaverit virum contra uxorem suam quae vel polluta est vel falsa suspicione appetitur

¹⁵ adducet eam ad sacerdotem et offeret oblationem pro illa decimam partem sati farinae hordiaciae non fundet super eam oleum nec inponet tus quia sacrificium zelotypiae est et oblatio investigans adulterium

¹⁶ offeret igitur eam sacerdos et statuet coram Domino

¹⁷ adsumetque aquam sanctam in vase fictili et pauxillum terrae de pavimento tabernaculi mittet in eam

¹⁸ cumque steterit mulier in conspectu Domini discoperiet caput eius et ponet super manus illius sacrificium recordationis et oblationem zelotypiae ipse autem tenebit aquas amarissimas in quibus cum execratione maledicta congescit

¹⁹ adiurabitque eam et dicet si non dormivit vir alienus tecum et si non polluta es deserto mariti toro non te nocebunt aquae istae amarissimae in quas maledicta congesi

²⁰ sin autem declinasti a viro tuo atque polluta es et concubuisti cum altero

²¹ his maledictionibus subiacebis det te Dominus in maledictionem exemplumque cunctorum in populo suo putrescere faciat femur tuum et tumens uterus disrumpatur

- ²² ingrediantur aquae maledictae in ventrem tuum et utero tumescente putrescat femur et respondebit mulier amen amen
- ²³ scribetque sacerdos in libello ista maledicta et delebit ea aquis amarissimis in quas maledicta congessit
- ²⁴ et dabit ei bibere quas cum exhauserit
- ²⁵ tollet sacerdos de manu eius sacrificium zelotypiae et elevabit illud coram Domino inponetque super altare ita dumtaxat ut prius
- ²⁶ pugillum sacrificii tollat de eo quod offertur et incendat super altare et sic potum det mulieri aquas amarissimas
- ²⁷ quas cum biberit si polluta est et contempto viro adulterii rea pertransibunt eam aquae maledictionis et inflato ventre conputrescet femur eritque mulier in maledictionem et in exemplum omni populo
- ²⁸ quod si polluta non fuerit erit innoxia et faciet liberos
- ²⁹ ista est lex zelotypiae si declinaverit mulier a viro suo et si polluta fuerit
- ³⁰ maritusque zelotypiae spiritu concitatus adduxerit eam in conspectu Domini et fecerit ei sacerdos iuxta omnia quae scripta sunt
- ³¹ maritus absque culpa erit et illa recipiet iniquitatem suam

CAPITULUM 6

Ilocutus est Dominus ad Mosen dicens

- ² loquere ad filios Israhel et dices ad eos vir sive mulier cum fecerit votum ut sanctificentur et se voluerint Domino consecrare
- ³ vino et omni quod inebriare potest abstinebunt acetum ex vino et ex qualibet alia potione et quicquid de uva exprimitur non bibent uvas recentes siccasque non comedent
- ⁴ cunctis diebus quibus ex voto Domino consecrantur quicquid ex vinea esse potest ab uva passa usque ad acinum non comedent
- ⁵ omni tempore separationis suae novacula non transibit super caput eius usque ad completum diem quo Domino consecratur sanctus erit crescente caesarie capitis eius
- ⁶ omni tempore consecrationis suae super mortuum non ingreditur
- ⁷ nec super patris quidem et matris et fratris sororisque funere contaminabitur quia consecratio Dei sui super caput eius est
- ⁸ omnes dies separationis suae sanctus erit Domino
- ⁹ sin autem mortuus fuerit subito quispiam coram eo polluetur caput consecrationis eius quod radet ilico et in eadem die purgationis suae et rursum septima
- ¹⁰ in octavo autem die offeret duos turtures vel duos pullos columbae sacerdoti in introitu foederis testimonii
- ¹¹ facietque sacerdos unum pro peccato et alterum in holocaustum et deprecabitur pro eo quia peccavit super mortuo sanctificabitque caput eius in die illo
- ¹² et consecrabit Domino dies separationis illius offerens agnum anniculum pro peccato ita tamen ut dies priores irriti fiant quoniam polluta est sanctificatio eius
- ¹³ ista est lex consecrationis cum dies quos ex voto decreverat complebuntur adducet eum ad ostium tabernaculi foederis
- ¹⁴ et offeret oblationem eius Domino agnum anniculum immaculatum in holocaustum et ovem anniculam immaculatam pro peccato et arietem immaculatum hostiam pacificam

- ¹⁵ canistrum quoque panum azymorum qui conspersi sunt oleo et lagana absque fermento uncta oleo ac libamina singulorum
- ¹⁶ quae offeret sacerdos coram Domino et faciet tam pro peccato quam in holocaustum
- ¹⁷ arietem vero immolabit hostiam pacificam Domino offerens simul canistrum azymorum et libamenta quae ex more debentur
- ¹⁸ tunc radetur nazareus ante ostium tabernaculi foederis caesarie consecrationis suae tolletque capillos eius et ponet super ignem qui est subpositus sacrificio pacificorum
- ¹⁹ et armum coctum arietis tortamque absque fermento unam de canistro et laganum azymum unum et tradet in manibus nazarei postquam rasum fuerit caput eius
- ²⁰ susceptaque rursum ab eo elevabit in conspectu Domini et sanctificata sacerdotis erunt sicut pectusculum quod separari iussum est et femur post haec potest bibere nazareus vinum
- ²¹ ista est lex nazarei cum voverit oblationem suam Domino tempore consecrationis suae exceptis his quae invenerit manus eius iuxta quod mente devoverat ita faciet ad perfectionem sanctificationis suae
- ²² locutus est Dominus ad Mosen dicens
- ²³ loquere Aaron et filiis eius sic benedicetis filiis Israhel et dicetis eis
- ²⁴ benedicat tibi Dominus et custodiat te
- ²⁵ ostendat Dominus faciem suam tibi et misereatur tui
- ²⁶ convertat Dominus vultum suum ad te et det tibi pacem
- ²⁷ invocabunt nomen meum super filios Israhel et ego benedicam eis

CAPITULUM 7

- f**actum est autem in die qua conplevit Moses tabernaculum et erexit illud unxitque et sanctificavit cum omnibus vasis suis altare similiter et vasa eius
- ² obtulerunt principes Israhel et capita familiarum qui erant per singulas tribus praefecti eorum qui numerati fuerant
- ³ munera coram Domino sex plaustra tecta cum duodecim bubus unum plaustrum obtulere duo duces et unum bovem singuli obtuleruntque ea in conspectu tabernaculi
- ⁴ ait autem Dominus ad Mosen
- ⁵ suscipe ab eis ut serviant in ministerio tabernaculi et tradas ea Levitis iuxta ordinem ministerii sui
- ⁶ itaque cum suscepisset Moses plaustra et boves tradidit eos Levitis
- ⁷ duo plaustra et quattuor boves dedit filiis Gerson iuxta id quod habebant necessarium
- ⁸ quattuor alia plaustra et octo boves dedit filiis Merari secundum officia et cultum suum sub manu Ithamar filii Aaron sacerdotis
- ⁹ filiis autem Caath non dedit plaustra et boves quia in sanctuario serviunt et onera propriis portant umeris
- ¹⁰ igitur obtulerunt duces in dedicationem altaris die qua unctum est oblationem suam ante altare
- ¹¹ dixitque Dominus ad Mosen singuli duces per singulos dies offerant munera in dedicationem altaris
- ¹² primo die obtulit oblationem suam Naasson filius Aminadab de tribu Iuda
- ¹³ fueruntque in ea acetabulum argenteum pondo centum triginta siclorum fiala argentea

habens septuaginta siclos iuxta pondus sanctuarii utrumque plenum simila conspersa oleo in sacrificium

14 mortariolum ex decem siclis aureis plenum incenso

15 bovem et arietem et agnum anniculum in holocaustum

16 hircumque pro peccato

17 et in sacrificio pacificorum boves duos arietes quinque hircos quinque agnos anniculos quinque haec est oblatio Naasson filii Aminadab

18 secundo die obtulit Nathanahel filius Suar dux de tribu Isachar

19 acetabulum argenteum adpendens centum triginta siclos fialam argenteam habentem septuaginta siclos iuxta pondus sanctuarii utrumque plenum simila conspersa oleo in sacrificium

20 mortariolum aureum habens decem siclos plenum incenso

21 bovem de armento et arietem et agnum anniculum in holocaustum

22 hircumque pro peccato

23 et in sacrificio pacificorum boves duos arietes quinque hircos quinque agnos anniculos quinque haec fuit oblatio Nathanahel filii Suar

24 tertio die princeps filiorum Zabulon Heliab filius Helon

25 obtulit acetabulum argenteum adpendens centum triginta siclos fialam argenteam habentem septuaginta siclos ad pondus sanctuarii utrumque plenum simila conspersa oleo in sacrificium

26 mortariolum aureum adpendens decem siclos plenum incenso

27 bovem de armento et arietem et agnum anniculum in holocaustum

28 hircumque pro peccato

29 et in sacrificio pacificorum boves duos arietes quinque hircos quinque agnos anniculos quinque haec est oblatio Heliab filii Helon

30 die quarto princeps filiorum Ruben Helisur filius Sedeur

31 obtulit acetabulum argenteum adpendens centum triginta siclos fialam argenteam habentem septuaginta siclos ad pondus sanctuarii utrumque plenum simila conspersa oleo in sacrificium

32 mortariolum aureum adpendens decem siclos plenum incenso

33 bovem de armento et arietem et agnum anniculum in holocaustum

34 hircumque pro peccato

35 et in hostias pacificorum boves duos arietes quinque hircos quinque agnos anniculos quinque haec fuit oblatio Helisur filii Sedeur

36 die quinto princeps filiorum Symeon Salamihel filius Surisaddai

37 obtulit acetabulum argenteum adpendens centum triginta siclos fialam argenteam habentem septuaginta siclos ad pondus sanctuarii utrumque plenum simila conspersa oleo in sacrificium

38 mortariolum aureum adpendens decem siclos plenum incenso

39 bovem de armento et arietem et agnum anniculum in holocaustum

40 hircumque pro peccato

41 et in hostias pacificorum boves duos arietes quinque hircos quinque agnos anniculos quinque haec fuit oblatio Salamihel filii Surisaddai

42 die sexto princeps filiorum Gad Heliasaph filius Duhel

43 obtulit acetabulum argenteum adpendens centum triginta siclos fialam argenteam

habentem septuaginta siclos ad pondus sanctuarii utrumque plenum simila conspersa oleo in sacrificium

44 mortariolum aureum adpendens siclos decem plenum incenso

45 bovem de armento et arietem et agnum anniculum in holocaustum

46 hircumque pro peccato

47 et in hostias pacificorum boves duos arietes quinque hircos quinque agnos anniculos quinque haec fuit oblatio Heliasaph filii Duhel

48 die septimo princeps filiorum Ephraim Helisama filius Ammiud

49 obtulit acetabulum argenteum adpendens centum triginta siclos fialam argenteam habentem septuaginta siclos ad pondus sanctuarii utrumque plenum simila conspersa oleo in sacrificium

50 mortariolum aureum adpendens decem siclos plenum incenso

51 bovem de armento et arietem et agnum anniculum in holocaustum

52 hircumque pro peccato

53 et in hostias pacificas boves duos arietes quinque hircos quinque agnos anniculos quinque haec fuit oblatio Helisama filii Ammiud

54 die octavo princeps filiorum Manasse Gamalihel filius Phadassur

55 obtulit acetabulum argenteum adpendens centum triginta siclos fialam argenteam habentem septuaginta siclos ad pondus sanctuarii utrumque plenum simila conspersa oleo in sacrificium

56 mortariolum aureum adpendens decem siclos plenum incenso

57 bovem de armento et arietem et agnum anniculum in holocaustum

58 hircumque pro peccato

59 et in hostias pacificorum boves duos arietes quinque hircos quinque agnos anniculos quinque haec fuit oblatio Gamalihel filii Phadassur

60 die nono princeps filiorum Benjamin Abidan filius Gedeonis

61 obtulit acetabulum argenteum adpendens centum triginta siclos fialam argenteam habentem septuaginta siclos ad pondus sanctuarii utrumque plenum simila conspersa oleo in sacrificium

62 mortariolum aureum adpendens decem siclos plenum incenso

63 bovem de armento et arietem et agnum anniculum in holocaustum

64 hircumque pro peccato

65 et in hostias pacificorum boves duos arietes quinque hircos quinque agnos anniculos quinque haec fuit oblatio Abidan filii Gedeonis

66 die decimo princeps filiorum Dan Ahiezer filius Amisaddai

67 obtulit acetabulum argenteum adpendens centum triginta siclos fialam argenteam habentem septuaginta siclos ad pondus sanctuarii utrumque plenum simila conspersa oleo in sacrificium

68 mortariolum aureum adpendens decem siclos plenum incenso

69 bovem de armento et arietem et agnum anniculum in holocaustum

70 hircumque pro peccato

71 et in hostias pacificorum boves duos arietes quinque hircos quinque agnos anniculos quinque haec fuit oblatio Ahiezer filii Amisaddai

72 die undecimo princeps filiorum Aser Phagaihel filius Ochran

73 obtulit acetabulum argenteum adpendens centum triginta siclos fialam argenteam

habentem septuaginta siclos ad pondus sanctuarii utrumque plenum simila conspersa oleo in sacrificium

74 mortariolum aureum adpendens decem siclos plenum incenso

75 bovem de armento et arietem et agnum anniculum in holocaustum

76 hircumque pro peccato

77 et in hostias pacificorum boves duos arietes quinque hircos quinque agnos anniculos quinque haec fuit oblatio Phagaihel filii Ochran

78 die duodecimo princeps filiorum Nepthalim Achira filius Henan

79 obtulit acetabulum argenteum adpendens centum triginta siclos fialam argenteam habentem septuaginta siclos ad pondus sanctuarii utrumque plenum simila conspersa oleo in sacrificium

80 mortariolum aureum adpendens decem siclos plenum incenso

81 bovem de armento et arietem et agnum anniculum in holocaustum

82 hircumque pro peccato

83 et in hostias pacificorum boves duos arietes quinque hircos quinque agnos anniculos quinque haec fuit oblatio Achira filii Henan

84 haec in dedicatione altaris oblata sunt a principibus Israhel in die qua consecratum est acetabula argentea duodecim fialae argenteae duodecim mortariola aurea duodecim

85 ita ut centum triginta argenti siclos haberet unum acetabulum et septuaginta siclos una fiala id est in commune vasorum omnium ex argento sicli duo milia quadringenti pondere sanctuarii

86 mortariola aurea duodecim plena incenso denos siclos adpendentia pondere sanctuarii id est simul auri sicli centum viginti

87 boves de armento in holocaustum duodecim arietes duodecim agni anniculi duodecim et libamenta eorum hirci duodecim pro peccato

88 hostiae pacificorum boves viginti quattuor arietes sexaginta hirci sexaginta agni anniculi sexaginta haec oblata sunt in dedicatione altaris quando unctum est

89 cumque ingrederetur Moses tabernaculum foederis ut consuleret oraculum audiebat vocem loquentis ad se de propitiatorio quod erat super arcam testimonii inter duos cherubin unde et loquebatur ei

CAPITULUM 8

Ilocutus est Dominus ad Mosen dicens

2 loquere Aaroni et dices ad eum cum posueris septem lucernas contra eam partem quam candelabrum respicit lucere debebunt

3 fecitque Aaron et inposuit lucernas super candelabrum ut praeceperat Dominus Mosi

4 haec autem erat factura candelabri ex auro ductili tam medius stipes quam cuncta ex utroque calamorum latera nascebantur iuxta exemplum quod ostendit Dominus Mosi ita operatus est candelabrum

5 et locutus est Dominus ad Mosen dicens

6 tolle Levitas de medio filiorum Israhel et purificabis eos

7 iuxta hunc ritum aspergantur aqua lustrationis et radant omnes pilos carnis suae cumque laverint vestimenta sua et mundati fuerint

8 tollant bovem de armentis et libamentum eius similam oleo conspersam bovem autem alterum de armento tu accipies pro peccato

⁹ et adplicabis Levitas coram tabernaculo foederis convocata omni multitudine filiorum Israhel

¹⁰ cumque Levitae fuerint coram Domino ponent filii Israhel manus suas super eos

¹¹ et offeret Aaron Levitas munus in conspectu Domini a filiis Israhel ut serviant in ministerio eius

¹² Levitae quoque ponent manus suas super capita boum e quibus unum facies pro peccato et alterum in holocaustum Domini ut depreceturis pro eis

¹³ statuesque Levitas in conspectu Aaron et filiorum eius et consecrabis oblatos Domino

¹⁴ ac separabis de medio filiorum Israhel ut sint mei

¹⁵ et postea ingrediantur tabernaculum foederis ut serviant mihi sicque purificabis et consecrabis eos in oblationem Domini quoniam dono donati sunt mihi a filiis Israhel

¹⁶ pro primogenitis quae aperiunt omnem vulvam in Israhel accepi eos

¹⁷ mea sunt omnia primogenita filiorum Israhel tam ex hominibus quam ex iumentis ex die quo percussi omnem primogenitum in terra Aegypti sanctificavi eos mihi

¹⁸ et tuli Levitas pro cunctis primogenitis filiorum Israhel

¹⁹ tradidique eos dono Aaroni et filiis eius de medio populi ut serviant mihi pro Israhel in tabernaculo foederis et orent pro eis ne sit in populo plaga si ausi fuerint accedere ad sanctuarium

²⁰ feceruntque Moses et Aaron et omnis multitudo filiorum Israhel super Levitas quae praeceperat Dominus Mosi

²¹ purificatique sunt et laverunt vestimenta sua elevavitque eos Aaron in conspectu Domini et oravit pro eis

²² ut purificati ingrederentur ad officia sua in tabernaculum foederis coram Aaron et filiis eius sicut praeceperat Dominus Mosi de Levitis ita factum est

²³ locutus est Dominus ad Mosen dicens

²⁴ haec est lex Levitarum a viginti quinque annis et supra ingredientur ut ministrent in tabernaculo foederis

²⁵ cumque quinquagesimum annum aetatis impleverint servire cessabunt

²⁶ eruntque ministri fratrum suorum in tabernaculo foederis ut custodiant quae sibi fuerint commendata opera autem ipsa non faciant sic dispones Levitas in custodiis suis

CAPITULUM 9

Locutus est Dominus ad Mosen in deserto Sinai anno secundo postquam egressi sunt de terra Aegypti mense primo dicens

² faciant filii Israhel phase in tempore suo

³ quartadecima die mensis huius ad vesperam iuxta omnes caerimonias et iustificationes eius

⁴ praecepitque Moses filiis Israhel ut facerent phase

⁵ qui fecerunt tempore suo quartadecima die mensis ad vesperam in monte Sinai iuxta omnia quae mandaverat Dominus Mosi fecerunt filii Israhel

⁶ ecce autem quidam inmundi super animam hominis qui non poterant facere pascha in die illo accedentes ad Mosen et Aaron

⁷ dixerunt eis inmundi sumus super animam hominis quare fraudamur ut non valeamus offerre oblationem Domino in tempore suo inter filios Israhel

- ⁸ quibus respondit Moses state ut consulam quid praecipiat Dominus de vobis
- ⁹ locutusque est Dominus ad Mosen dicens
- ¹⁰ loquere filiis Israhel homo qui fuerit immundus super anima sive in via procul in gente vestra faciat phase Domino
- ¹¹ mense secundo quartadecima die mensis ad vesperam cum azymis et lactucis agrestibus comedent illud
- ¹² non relinquent ex eo quippiam usque mane et os eius non confringent omnem ritum phase observabunt
- ¹³ si quis autem et mundus est et in itinere non fuit et tamen non fecit phase exterminabitur anima illa de populis suis quia sacrificium Domino non obtulit tempore suo peccatum suum ipse portabit
- ¹⁴ peregrinus quoque et advena si fuerit apud vos faciet phase Domini iuxta caerimonias et iustificationes eius praeceptum idem erit apud vos tam advenae quam indigenae
- ¹⁵ igitur die qua erectum est tabernaculum operuit illud nubes a vespere autem super tentorium erat quasi species ignis usque mane
- ¹⁶ sic fiebat iugiter per diem operiebat illud nubes et per noctem quasi species ignis
- ¹⁷ cumque ablata fuisset nubes quae tabernaculum protegebat tunc proficiscebantur filii Israhel et in loco ubi stetisset nubes ibi castrametabantur
- ¹⁸ ad imperium Domini proficiscebantur et ad imperium illius figebant tabernaculum cunctis diebus quibus stabat nubes super tabernaculum manebant in eodem loco
- ¹⁹ et si evenisset ut multo tempore maneret super illud erant filii Israhel in excubiis Domini et non proficiscebantur
- ²⁰ quotquot diebus fuisset nubes super tabernaculum ad imperium Domini erigebant tentoria et ad imperium illius deponebant
- ²¹ si fuisset nubes a vespere usque mane et statim diluculo tabernaculum reliquisset proficiscebantur et si post diem et noctem recessisset dissipabant tentoria
- ²² si biduo aut uno mense vel longiori tempore fuisset super tabernaculum manebant filii Israhel in eodem loco et non proficiscebantur statim autem ut recessisset movebant castra
- ²³ per verbum Domini figebant tentoria et per verbum illius proficiscebantur erantque in excubiis Domini iuxta imperium eius per manum Mosi

CAPITULUM 10

Ilocutus est Dominus ad Mosen dicens

- ² fac tibi duas tubas argenteas ductiles quibus convocare possis multitudinem quando movenda sunt castra
- ³ cumque increpueris tubis congregabitur ad te omnis turba ad ostium foederis tabernaculi
- ⁴ si semel clangueris venient ad te principes et capita multitudinis Israhel
- ⁵ sin autem prolixior atque concisus clangor increpaverit movebunt castra primi qui sunt ad orientalem plagam
- ⁶ in secundo autem sonitu et pari ululatu tubae levabunt tentoria qui habitant ad meridiem et iuxta hunc modum reliqui facient ululantibus tubis in profectione
- ⁷ quando autem congregandus est populus simplex tubarum clangor erit et non concise ululabunt
- ⁸ filii Aaron sacerdotes clangent tubis eritque hoc legitimum sempiternum in generationibus vestris

⁹ si exieritis ad bellum de terra vestra contra hostes qui dimicant adversum vos clangetis ululantibus tubis et erit recordatio vestri coram Domino Deo vestro ut eruamini de manibus inimicorum vestrorum

¹⁰ si quando habebitis epulum et dies festos et kalendas canetis tubis super holocaustis et pacificis victimis ut sint vobis in recordationem Dei vestri ego Dominus Deus vester

¹¹ anno secundo mense secundo vicesima die mensis elevata est nubes de tabernaculo foederis

¹² profectique sunt filii Israhel per turmas suas de deserto Sinai et recubuit nubes in solitudine Pharan

¹³ moveruntque castra primi iuxta imperium Domini in manu Mosi

¹⁴ filii Iuda per turmas suas quorum princeps erat Naasson filius Aminadab

¹⁵ in tribu filiorum Isachar fuit princeps Nathanahel filius Suar

¹⁶ in tribu Zabulon erat princeps Heliab filius Helon

¹⁷ depositumque est tabernaculum quod portantes egressi sunt filii Gerson et Merari

¹⁸ profectique sunt et filii Ruben per turmas et ordinem suum quorum princeps erat Helisur filius Seduc

¹⁹ in tribu autem filiorum Symeon princeps fuit Salamiel filius Surisaddai

²⁰ porro in tribu Gad erat princeps Heliasaph filius Dui

²¹ profectique sunt et Caathitae portantes sanctuarium tamdiu tabernaculum portabatur donec venirent ad erectionis locum

²² moverunt castra et filii Ephraim per turmas suas in quorum exercitu princeps erat Helisama filius Ammiud

²³ in tribu autem filiorum Manasse princeps fuit Gamaliel filius Phadassur

²⁴ et in tribu Benjamin dux Abidan filius Gedeonis

²⁵ novissimi castrorum omnium profecti sunt filii Dan per turmas suas in quorum exercitu princeps fuit Ahiezer filius Amisaddai

²⁶ in tribu autem filiorum Aser erat princeps Phagiel filius Ochran

²⁷ et in tribu filiorum Nephtalim princeps Achira filius Henan

²⁸ haec sunt castra et profectiones filiorum Israhel per turmas suas quando egrediebantur

²⁹ dixitque Moses Hobab filio Rahuel Madianiti cognato suo proficiscimur ad locum quem Dominus daturus est nobis veni nobiscum ut beneficiamus tibi quia Dominus bona promisit Israheli

³⁰ cui ille respondit non vadam tecum sed revertar in terram meam in qua natus sum

³¹ et ille noli inquit nos relinquere tu enim nosti in quibus locis per desertum castra ponere debeamus et eris ductor noster

³² cumque nobiscum veneris quicquid optimum fuerit ex opibus quas nobis traditurus est Dominus dabimus tibi

³³ profecti sunt ergo de monte Domini via trium dierum arcaque foederis Domini praecedebat eos per dies tres providens castrorum locum

³⁴ nubes quoque Domini super eos erat per diem cum incederent

³⁵ cumque elevaretur arca dicebat Moses surge Domine et dissipentur inimici tui et fugiant qui oderunt te a facie tua

³⁶ cum autem deponeretur aiebat revertere Domine ad multitudinem exercitus Israhel

CAPITULUM 11

Interea ortum est murmur populi quasi dolentium pro labore contra Dominum quod cum audisset iratus est et accensus in eos ignis Domini devoravit extremam castrorum partem

² cumque clamasset populus ad Moysen oravit Moyses Dominum et absortus est ignis

³ vocavitque nomen loci illius Incensio eo quod succensus fuisset contra eos ignis Domini

⁴ vulgus quippe promiscuum quod ascenderat cum eis flagravat desiderio sedens et flens iunctis sibi pariter filiis Israhel et ait quis dabit nobis ad vescendum carnes

⁵ recordamur piscium quos comedebamus in Aegypto gratis in mentem nobis veniunt cucumeres et pepones porrique et cepae et alia

⁶ anima nostra arida est nihil aliud respiciunt oculi nostri nisi man

⁷ erat autem man quasi semen coriandri coloris bdellii

⁸ circuibatque populus et colligens illud frangebatur mola sive terebat in mortario coquens in olla et faciens ex eo tortulas saporis quasi panis oleati

⁹ cumque descenderet nocte super castra ros descendebat pariter et man

¹⁰ audivit ergo Moyses flentem populum per familias singulos per ostia tentorii sui iratusque est furor Domini valde sed et Mosi intoleranda res visa est

¹¹ et ait ad Dominum cur adflixisti servum tuum quare non invenio gratiam coram te et cur inposuisti pondus universi populi huius super me

¹² numquid ego concepi omnem hanc multitudinem vel genui eam ut dicas mihi porta eos in sinu tuo sicut portare solet nutrix infantulum et defer in terram pro qua iurasti patribus eorum

¹³ unde mihi carnes ut dem tantae multitudini flent contra me dicentes da nobis carnes ut comedamus

¹⁴ non possum solus sustinere omnem hunc populum quia gravis mihi est

¹⁵ sin aliter tibi videtur obsecro ut interficias me et inveniam gratiam in oculis tuis ne tantis adficiar malis

¹⁶ et dixit Dominus ad Moysen congrega mihi septuaginta viros de senibus Israhel quos tu nosti quod senes populi sint ac magistri et duces eos ad ostium tabernaculi foederis faciesque ibi stare tecum

¹⁷ ut descendam et loquar tibi et auferam de spiritu tuo tradamque eis ut sustentent tecum onus populi et non tu solus graveris

¹⁸ populo quoque dices sanctificamini cras comedetis carnes ego enim audivi vos dicere quis dabit nobis escas carniū bene nobis erat in Aegypto ut det vobis Dominus carnes et comedatis

¹⁹ non uno die nec duobus vel quinque aut decem nec viginti quidem

²⁰ sed usque ad mensem dierum donec exeat per nares vestras et vertatur in nausiam eo quod reppuleritis Dominum qui in medio vestri est et flevitis coram eo dicentes quare egressi sumus ex Aegypto

²¹ et ait Moyses sescenta milia peditum huius populi sunt et tu dicis dabo eis esum carniū mense integro

²² numquid ovium et boum multitudo caedetur ut possit sufficere ad cibum vel omnes pisces maris in unum congregabuntur ut eos satient

²³ cui respondit Dominus numquid manus Domini invalida est iam nunc videbis utrum meus sermo opere conpleatur

²⁴ venit igitur Moyses et narravit populo verba Domini congregans septuaginta viros de senibus Israhel quos stare fecit circa tabernaculum

²⁵ descenditque Dominus per nubem et locutus est ad eum auferens de spiritu qui erat in

Mosen et dans septuaginta viris cumque requievisset in eis spiritus prophetaverunt nec ultra cessarunt

²⁶ remanserant autem in castris duo viri quorum unus vocabatur Heldad et alter Medad super quos requievit spiritus nam et ipsi descripti fuerant et non exierant ad tabernaculum

²⁷ cumque prophetarent in castris cucurrit puer et nuntiavit Mosi dicens Heldad et Medad prophetant in castris

²⁸ statim Iosue filius Nun minister Mosi et electus e pluribus ait domine mi Moses prohibe eos

²⁹ at ille quid inquit aemularis pro me quis tribuat ut omnis populus prophetet et det eis Dominus spiritum suum

³⁰ reversusque est Moses et maiores natu Israhel in castra

³¹ ventus autem egrediens a Domino arreptas trans mare coturnices detulit et dimisit in castra itinere quantum uno die confici potest ex omni parte castrorum per circuitum volabantque in aere duobus cubitis altitudine super terram

³² surgens ergo populus toto die illo et nocte ac die altero congregavit coturnicum qui parum decem choros et siccaverunt eas per gyrum castrorum

³³ adhuc carnes erant in dentibus eorum nec defecerat huiuscemodi cibus et ecce furor Domini concitatus in populum percussit eum plaga magna nimis

³⁴ vocatusque est ille locus sepulchra Concupiscentiae ibi enim sepelierunt populum qui desideraverat

³⁵ (11:34) egressi autem de sepulchris Concupiscentiae venerunt in Aseroth et manserunt ibi

CAPITULUM 12

Locutaque est Maria et Aaron contra Mosen propter uxorem eius aethiopissam

² et dixerunt num per solum Mosen locutus est Dominus nonne et nobis similiter est locutus quod cum audisset Dominus

³ erat enim Moses vir mitissimus super omnes homines qui morabantur in terra

⁴ statim locutus est ad eum et ad Aaron et Mariam egredimini vos tantum tres ad tabernaculum foederis cumque fuissent egressi

⁵ descendit Dominus in columna nubis et stetit in introitu tabernaculi vocans Aaron et Mariam qui cum issent

⁶ dixit ad eos audite sermones meos si quis fuerit inter vos propheta Domini in visione apparebo ei vel per somnium loquar ad illum

⁷ at non talis servus meus Moses qui in omni domo mea fidelissimus est

⁸ ore enim ad os loquor ei et palam non per enigmata et figuras Dominum videt quare igitur non timuistis detrahare servo meo Mosi

⁹ iratusque contra eos abiit

¹⁰ nubes quoque recessit quae erat super tabernaculum et ecce Maria apparuit candens lepra quasi nix cumque respexisset eam Aaron et vidisset perfusam lepra

¹¹ ait ad Mosen obsecro domine mi ne inponas nobis hoc peccatum quod stulte commisimus

¹² ne fiat haec quasi mortua et ut abortivum quod proicitur de vulva matris suae ecce iam medium carnis eius devoratum est lepra

¹³ clamavitque Moses ad Dominum dicens Deus obsecro sana eam

- ¹⁴ cui respondit Dominus si pater eius spuisset in faciem illius nonne debuerat saltem septem dierum rubore suffundi separetur septem diebus extra castra et postea revocabitur
- ¹⁵ exclusa est itaque Maria extra castra septem diebus et populus non est motus de loco illo donec revocata est Maria
- ¹⁶ (13:1) profectus est de Aseroth fixis tentoriis in deserto Pharan

CAPITULUM 13

(13:2)

Ibi locutus est Dominus ad Mosen dicens

² (13:3) mitte viros qui considerent terram Chanaan quam daturus sum filiis Israhel singulos de singulis tribubus ex principibus

³ (13:4) fecit Moses quod Dominus imperarat de deserto Pharan mittens principes viros quorum ista sunt nomina

⁴ (13:5) de tribu Ruben Semmua filium Zecchur

⁵ (13:6) de tribu Symeon Saphat filium Huri

⁶ (13:7) de tribu Iuda Chaleb filium Iepphonne

⁷ (13:8) de tribu Isachar Igal filium Ioseph

⁸ (13:9) de tribu Ephraim Osee filium Nun

⁹ (13:10) de tribu Benjamin Phalti filium Raphu

¹⁰ (13:11) de tribu Zabulon Geddihel filium Sodi

¹¹ (13:12) de tribu Ioseph sceptri Manasse Gaddi filium Susi

¹² (13:13) de tribu Dan Ammihel filium Gemalli

¹³ (13:14) de tribu Aser Sthur filium Michahel

¹⁴ (13:15) de tribu Nepthali Naabbi filium Vaphsi

¹⁵ (13:16) de tribu Gad Guhel filium Machi

¹⁶ (13:17) haec sunt nomina virorum quos misit Moses ad considerandam terram vocavitque Osee filium Nun Iosue

¹⁷ (13:18) misit ergo eos Moses ad considerandam terram Chanaan et dixit ad eos ascendite per meridianam plagam cumque veneritis ad montes

¹⁸ (13:19) considerate terram qualis sit et populum qui habitator est eius utrum fortis sit an infirmus pauci numero an plures

¹⁹ (13:20) ipsa terra bona an mala urbes quales muratae an absque muris

²⁰ (13:21) humus pinguis an sterilis nemorosa an absque arboribus confortamini et adferte nobis de fructibus terrae erat autem tempus quando iam praecoquae uvae vesci possunt

²¹ (13:22) cumque ascendissent exploraverunt terram a deserto Sin usque Roob intransibus Emath

²² (13:23) ascenderuntque ad meridiem et venerunt in Hebron ubi erant Ahiman et Sisai et Tholmai filii Enach nam Hebron septem annis ante Tanim urbem Aegypti condita est

²³ (13:24) pergentesque usque ad torrentem Botri absciderunt palmitem cum uva sua quem portaverunt in vecte duo viri de malis quoque granatis et de ficis loci illius tulerunt

²⁴ (13:25) qui appellatus est Neelescol id est torrens Botri eo quod botrum inde portassent filii Israhel

²⁵ (13:26) reversique exploratores terrae post quadraginta dies omni regione circuita

²⁶ (13:27) venerunt ad Mosen et Aaron et ad omnem coetum filiorum Israhel in desertum

Pharan quod est in Cades locutique eis et omni multitudini ostenderunt fructus terrae
²⁷ (13:28) et narraverunt dicentes venimus in terram ad quam misisti nos quae re vera fluit lacte et melle ut ex his fructibus cognosci potest
²⁸ (13:29) sed cultores fortissimos habet et urbes grandes atque muratas stirpem Enach vidimus ibi
²⁹ (13:30) Amalech habitat in meridie Hettheus et Iebuseus et Amorreus in montanis Chananeus vero moratur iuxta mare et circa fluentia Iordanis
³⁰ (13:31) inter haec Chaleb conpescens murmur populi qui oriebatur contra Moysen ait ascendamus et possideamus terram quoniam poterimus obtinere eam
³¹ (13:32) alii vero qui fuerant cum eo dicebant nequaquam ad hunc populum valemus ascendere quia fortior nobis est
³² (13:33) detraxeruntque terrae quam inspexerant apud filios Israhel dicentes terram quam lustravimus devorat habitatores suos populum quem aspeximus procerae staturae est
³³ (13:34) ibi vidimus monstra quaedam filiorum Enach de genere giganteo quibus comparati quasi lucustae videbamur

CAPITULUM 14

Igitur vociferans omnis turba flevit nocte illa
² et murmurati sunt contra Moysen et Aaron cuncti filii Israhel dicentes
³ utinam mortui essemus in Aegypto et non in hac vasta solitudine utinam pereamus et non inducat nos Dominus in terram istam ne cadamus gladio et uxores ac liberi nostri ducantur captivi nonne melius est reverti in Aegyptum
⁴ dixeruntque alter ad alterum constituamus nobis ducem et revertamur in Aegyptum
⁵ quo audito Moyses et Aaron ceciderunt proni in terram coram omni multitudine filiorum Israhel
⁶ at vero Iosue filius Nun et Chaleb filius Iepphonae qui et ipsi lustraverant terram sciderunt vestimenta sua
⁷ et ad omnem multitudinem filiorum Israhel locuti sunt terram quam circuivimus valde bona est
⁸ si propitius fuerit Dominus inducet nos in eam et tradet humum lacte et melle manantem
⁹ nolite rebelles esse contra Dominum neque timeatis populum terrae huius quia sicut panem ita eos possumus devorare recessit ab illis omne praesidium Dominus nobiscum est nolite metuere
¹⁰ cumque clamaret omnis multitudo et lapidibus eos vellet opprimere apparuit gloria Domini super tectum foederis cunctis filiis Israhel
¹¹ et dixit Dominus ad Moysen usquequo detrahet mihi populus iste quousque non credent mihi in omnibus signis quae feci coram eis
¹² feriam igitur eos pestilentia atque consumam te autem faciam principem super gentem magnam et fortiorem quam haec est
¹³ et ait Moyses ad Dominum ut audiant Aegyptii de quorum medio eduxisti populum istum
¹⁴ et habitatores terrae huius qui audierunt quod tu Domine in populo isto sis et facie videaris ad faciem et nubes tua protegat illos et in columna nubis praecedas eos per diem et in columna ignis per noctem
¹⁵ quod occideris tantam multitudinem quasi unum hominem et dicant

- 16** non poterat introducere populum in terram pro qua iuraverat idcirco occidit eos in solitudine
- 17** magnificetur ergo fortitudo Domini sicut iurasti dicens
- 18** Dominus patiens et multae misericordiae auferens iniquitatem et scelera nullumque innoxium derelinquens qui visitas peccata patrum in filios in tertiam et quartam generationem
- 19** dimitte obsecro peccatum populi tui huius secundum magnitudinem misericordiae tuae sicut propitius fuisti egredientibus de Aegypto usque ad locum istum
- 20** dixitque Dominus dimisi iuxta verbum tuum
- 21** vivo ego et implebitur gloria Domini universa terra
- 22** attamen omnes homines qui viderunt maiestatem meam et signa quae feci in Aegypto et in solitudine et temptaverunt me iam per decem vices nec oboedierunt voci meae
- 23** non videbunt terram pro qua iuravi patribus eorum nec quisquam ex illis qui detraxit mihi intuebitur eam
- 24** servum meum Chaleb qui plenus alio spiritu secutus est me inducam in terram hanc quam circuivit et semen eius possidebit eam
- 25** quoniam Amalechites et Chananeus habitant in vallibus cras movete castra et revertimini in solitudinem per viam maris Rubri
- 26** locutusque est Dominus ad Mosen et Aaron dicens
- 27** usquequo multitudo haec pessima murmurat contra me querellas filiorum Israhel audivi
- 28** dic ergo eis vivo ego ait Dominus sicut locuti estis audiente me sic faciam vobis
- 29** in solitudine hac iacebunt cadavera vestra omnes qui numerati estis a viginti annis et supra et murmurastis contra me
- 30** non intrabitis terram super quam levavi manum meam ut habitare vos facerem praeter Chaleb filium Iepphone et Iosue filium Nun
- 31** parvulos autem vestros de quibus dixistis quod praedae hostibus forent introducam ut videant terram quae vobis displicuit
- 32** vestra cadavera iacebunt in solitudine
- 33** filii vestri erunt vagi in deserto annis quadraginta et portabunt fornicationem vestram donec consumantur cadavera patrum in deserto
- 34** iuxta numerum quadraginta dierum quibus considerastis terram annus pro die inputabitur et quadraginta annis recipietis iniquitates vestras et scietis ultionem meam
- 35** quoniam sicut locutus sum ita faciam omni multitudini huic pessimae quae consurrexit adversum me in solitudine hac deficiet et morietur
- 36** igitur omnes viri quos miserat Moses ad contemplandam terram et qui reversi murmurare fecerant contra eum omnem multitudinem detrahentes terrae quod esset mala
- 37** mortui sunt atque percussi in conspectu Domini
- 38** Iosue autem filius Nun et Chaleb filius Iepphone vixerunt ex omnibus qui perrexerant ad considerandam terram
- 39** locutusque est Moses universa verba haec ad omnes filios Israhel et luxit populus nimis
- 40** et ecce mane primo surgentes ascenderunt verticem montis atque dixerunt parati sumus ascendere ad locum de quo Dominus locutus est quia peccavimus
- 41** quibus Moses cur inquit transgredimini verbum Domini quod vobis non cedit in prosperum
- 42** nolite ascendere non enim est Dominus vobiscum ne corruatis coram inimicis vestris

⁴³ Amalechites et Chananeus ante vos sunt quorum gladio corruetis eo quod nolueritis adquiescere Domino nec erit Dominus vobiscum

⁴⁴ at illi contenebrati ascenderunt in verticem montis arca autem testamenti Domini et Moses non recesserunt de castris

⁴⁵ descenditque Amalechites et Chananeus qui habitabant in monte et percutiens eos atque concidens persecutus est usque Horma

CAPITULUM 15

Locutus est Dominus ad Mosen dicens

² loquere ad filios Israhel et dices ad eos cum ingressi fueritis terram habitationis vestrae quam ego dabo vobis

³ et feceritis oblationem Domino in holocaustum aut victimam vota solventes vel sponte offerentes munera aut in sollemnitatibus vestris adolentes odorem suavitatis Domino de bubus sive de ovibus

⁴ offeret quicumque immolaverit victimam sacrificium similiae decimam partem oephi conspersae oleo quod mensuram habebit quartam partem hin

⁵ et vinum ad liba fundenda eiusdem mensurae dabit in holocausto sive in victima per agnos singulos

⁶ et arietis erit sacrificium similiae duarum decimarum quae conspersa sit oleo tertiae partis hin

⁷ et vinum ad libamentum tertiae partis eiusdem mensurae offeret in odorem suavitatis Domino

⁸ quando vero de bubus feceris holocaustum aut hostiam ut impleas votum vel pacificas victimas

⁹ dabis per singulos boves similiae tres decimas conspersae oleo quod habeat medium mensurae hin

¹⁰ et vinum ad liba fundenda eiusdem mensurae in oblationem suavissimi odoris Domino

¹¹ sic facietis

¹² per singulos boves et arietes et agnos et hedos

¹³ tam indigenae quam peregrini

¹⁴ eodem ritu offerent sacrificia

¹⁵ unum praeceptum erit atque iudicium tam vobis quam advenis terrae

¹⁶ locutus est Dominus ad Mosen dicens

¹⁷ loquere filiis Israhel et dices ad eos

¹⁸ cum veneritis in terram quam dabo vobis

¹⁹ et comederitis de panibus regionis illius separabitis primitias Domino

²⁰ de cibis vestris sicut de areis primitias separatis

²¹ ita et de pulmentis dabit primitiva Domino

²² quod si per ignorantiam praeterieritis quicquam horum quae locutus est Dominus ad Mosen

²³ et mandavit per eum ad vos a die qua coepit iubere et ultra

²⁴ oblitaque fuerit facere multitudo offeret vitulum de armento holocaustum in odorem suavissimum Domino et sacrificium eius ac liba ut caerimoniae postulant hircumque pro peccato

²⁵ et rogabit sacerdos pro omni multitudine filiorum Israhel et dimittetur eis quoniam non sponte peccaverunt nihilominus offerentes incensum Domino pro se et pro peccato atque errore suo

²⁶ et dimittetur universae plebi filiorum Israhel et advenis qui peregrinantur inter vos quoniam culpa est omnis populi per ignorantiam

²⁷ quod si anima una nesciens peccaverit offeret capram anniculam pro peccato suo

²⁸ et deprecabitur pro ea sacerdos quod inscia peccaverit coram Domino inpetrabitque ei veniam et dimittetur illi

²⁹ tam indigenis quam advenis una lex erit omnium qui peccaverint ignorantes

³⁰ anima vero quae per superbiam aliquid commiserit sive civis sit ille sive peregrinus quoniam adversum Dominum rebellis fuit peribit de populo suo

³¹ verbum enim Domini contempsit et praeceptum illius fecit irritum idcirco delebitur et portabit iniquitatem suam

³² factum est autem cum essent filii Israhel in solitudine et invenissent hominem colligentem ligna in die sabbati

³³ obtulerunt eum Mosi et Aaron et universae multitudini

³⁴ qui recluserunt eum in carcerem nescientes quid super eo facere deberent

³⁵ dixitque Dominus ad Mosen morte moriatur homo iste obruat eum lapidibus omnis turba extra castra

³⁶ cumque eduxissent eum foras obruerunt lapidibus et mortuus est sicut praeceperat Dominus

³⁷ dixit quoque Dominus ad Mosen

³⁸ loquere filiis Israhel et dices ad eos ut faciant sibi fimbrias per angulos palliorum ponentes in eis vittas hyacinthinas

³⁹ quas cum viderint recordentur omnium mandatorum Domini nec sequantur cogitationes suas et oculos per res varias fornicantes

⁴⁰ sed magis memores praeceptorum Domini faciant ea sintque sancti Deo suo

⁴¹ ego Dominus Deus vester qui eduxi vos de terra Aegypti ut essem vester Deus

CAPITULUM 16

Ecce autem Core filius Isaar filii Caath filii Levi et Dathan atque Abiram filii Heliab Hon quoque filius Pheleth de filiis Ruben

² surrexerunt contra Mosen aliique filiorum Israhel ducenti quinquaginta viri procures synagogae et qui tempore concilii per nomina vocabantur

³ cumque stetissent adversum Mosen et Aaron dixerunt sufficiat vobis quia omnis multitudo sanctorum est et in ipsis est Dominus cur elevamini super populum Domini

⁴ quod cum audisset Moses cecidit pronus in faciem

⁵ locutusque ad Core et ad omnem multitudinem mane inquit notum faciet Dominus qui ad se pertineant et sanctos adplicabit sibi et quos elegerit adpropinquabunt ei

⁶ hoc igitur facite tollat unusquisque turibula sua tu Core et omne concilium tuum

⁷ et hausto cras igne ponite desuper thymiama coram Domino et quemcumque elegerit ipse erit sanctus multum erigimini filii Levi

⁸ dixitque rursum ad Core audite filii Levi

⁹ num parum vobis est quod separavit vos Deus Israhel ab omni populo et iunxit sibi ut

serviretis ei in cultu tabernaculi et staretis coram frequentia populi et ministraretis ei

10 idcirco ad se fecit accedere te et omnes fratres tuos filios Levi ut vobis etiam sacerdotium vindicetis

11 et omnis globus tuus stet contra Dominum quid est enim Aaron ut murmuretis contra eum

12 misit ergo Moses ut vocaret Dathan et Abiram filios Heliab qui responderunt non venimus

13 numquid parum est tibi quod eduxisti nos de terra quae lacte et melle manabat ut occideres in deserto nisi et dominatus fueris nostri

14 re vera induxisti nos in terram quae fluit rivis lactis et mellis et dedisti nobis possessiones agrorum et vinearum an et oculos nostros vis eruere non venimus

15 iratusque Moses valde ait ad Dominum ne respicias sacrificia eorum tu scis quod ne asellum quidem umquam acceperim ab eis nec adflixerim quempiam eorum

16 dixitque ad Core tu et omnis congregatio tua state seorsum coram Domino et Aaron die crastino separatim

17 tollite singuli turibula vestra et ponite super ea incensum offerentes Domino ducenta quinquaginta turibula Aaron quoque teneat turibulum suum

18 quod cum fecissent stantibus Mosen et Aaron

19 et coacervassent adversum eos omnem multitudinem ad ostium tabernaculi apparuit cunctis gloria Domini

20 locutusque Dominus ad Mosen et Aaron ait

21 separamini de medio congregationis huius ut eos repente disperdam

22 qui ceciderunt proni in faciem atque dixerunt fortissime Deus spirituum universae carnis num uno peccante contra omnes tua ira desaeviet

23 et ait Dominus ad Mosen

24 praecipe universo populo ut separetur a tabernaculis Core et Dathan et Abiram

25 surrexitque Moses et abiit ad Dathan et Abiram et sequentibus eum senioribus Israhel

26 dixit ad turbam recedite a tabernaculis hominum impiorum et nolite tangere quae ad eos pertinent ne involvamini in peccatis eorum

27 cumque recessissent a tentoriis eorum per circuitum Dathan et Abiram egressi stabant in introitu papilionum suorum cum uxoribus et liberis omnique frequentia

28 et ait Moses in hoc scietis quod Dominus miserit me ut facerem universa quae cernitis et non ex proprio ea corde protulerim

29 si consueta hominum morte interierint et visitaverit eos plaga qua et ceteri visitari solent non misit me Dominus

30 sin autem novam rem fecerit Dominus ut aperiens terra os suum degluttiat eos et omnia quae ad illos pertinent descenderintque viventes in infernum scietis quod blasphemaverint Dominum

31 confestim igitur ut cessavit loqui disrupta est terra sub pedibus eorum

32 et aperiens os suum devoravit illos cum tabernaculis suis et universa substantia

33 descenderuntque vivi in infernum operti humo et perierunt de medio multitudinis

34 at vero omnis Israhel qui stabat per gyrum fugit ad clamorem pereuntium dicens ne forte et nos terra degluttiat

35 sed et ignis egressus a Domino interfecit ducentos quinquaginta viros qui offerebant incensum

36 locutusque est Dominus ad Mosen dicens

³⁷ praecipe Eleazaro filio Aaron sacerdotis ut tollat turibula quae iacent in incendio et ignem huc illucque dispergat quoniam sanctificata sunt

³⁸ in mortibus peccatorum producatque ea in lamminas et adfigat altari eo quod oblatum sit in eis incensum Domino et sanctificata sint ut cernant ea pro signo et monumento filii Israhel

³⁹ tulit ergo Eleazar sacerdos turibula aenea in quibus obtulerant hii quos incendium devoravit et produxit ea in lamminas adfigens altari

⁴⁰ ut haberent postea filii Israhel quibus commonerentur ne quis accedat alienigena et qui non est de semine Aaron ad offerendum incensum Domino ne patiatur sicut passus est Core et omnis congregatio eius loquente Domino ad Mosen

⁴¹ murmuravit autem omnis multitudo filiorum Israhel sequenti die contra Mosen et Aaron dicens vos interfecistis populum Domini

⁴² cumque oreretur seditio et tumultus incresceret

⁴³ Moses et Aaron fugerunt ad tabernaculum foederis quod postquam ingressi sunt operuit nubes et apparuit gloria Domini

⁴⁴ dixitque Dominus ad Mosen

⁴⁵ recedite de medio huius multitudinis etiam nunc delebo eos cumque iacerent in terra

⁴⁶ dixit Moses ad Aaron tolle turibulum et hausto igne de altari mitte incensum desuper pergens cito ad populum ut roges pro eis iam enim egressa est ira a Domino et plaga desaevit

⁴⁷ quod cum fecisset Aaron et cucurrisset ad mediam multitudinem quam iam vastabat incendium obtulit thymiama

⁴⁸ et stans inter mortuos ac viventes pro populo deprecatus est et plaga cessavit

⁴⁹ fuerunt autem qui percussi sunt quattuordecim milia hominum et septingenti absque his qui perierant in seditione Core

⁵⁰ reversusque est Aaron ad Mosen ad ostium tabernaculi foederis postquam quievit interitus

CAPITULUM 17

Et locutus est Dominus ad Mosen dicens

² loquere ad filios Israhel et accipe ab eis virgas singulas per cognationes suas a cunctis principibus tribuum virgas duodecim et uniuscuiusque nomen superscribes virgae suae

³ nomen autem Aaron erit in tribu Levi et una virga cunctas eorum familias continebit

⁴ ponesque eas in tabernaculo foederis coram testimonio ubi loquar ad te

⁵ quem ex his elegero germinabit virga eius et cohibebo a me querimonias filiorum Israhel quibus contra vos murmurant

⁶ locutusque est Moses ad filios Israhel et dederunt ei omnes principes virgas per singulas tribus fueruntque virgae duodecim absque virga Aaron

⁷ quas cum posuisset Moses coram Domino in tabernaculo testimonii

⁸ sequenti die regressus invenit germinasse virgam Aaron in domo Levi et turgentibus gemmis eruperant flores qui foliis dilatatis in amigdalas deformati sunt

⁹ protulit ergo Moses omnes virgas de conspectu Domini ad cunctos filios Israhel videruntque et receperunt singuli virgas suas

¹⁰ dixitque Dominus ad Mosen refer virgam Aaron in tabernaculum testimonii ut servetur ibi in signum rebellium filiorum et quiescant querellae eorum a me ne moriantur

- ¹¹ fecitque Moses sicut praeceperat Dominus
¹² dixerunt autem filii Israhel ad Mosén ecce consumpti sumus omnes perivimus
¹³ quicumque accedit ad tabernaculum Domini moritur num usque ad internicionem cuncti delendi sumus

CAPITULUM 18

- d**ixitque Dominus ad Aaron tu et filii tui et domus patris tui tecum portabitis iniquitatem sanctuarii et tu et filii tui simul sustinebitis peccata sacerdotii vestri
² sed et fratres tuos de tribu Levi et sceptro patris tui sume tecum praestoque sint et ministrent tibi tu autem et filii tui ministrabitis in tabernaculo testimonii
³ excubabuntque Levitae ad praecepta tua et ad cuncta opera tabernaculi ita dumtaxat ut ad vasa sanctuarii et altare non accedant ne et illi moriantur et vos pereatis simul
⁴ sint autem tecum et excubent in custodiis tabernaculi et in omnibus caerimoniis eius alienigena non miscebitur vobis
⁵ excubate in custodia sanctuarii et in ministerio altaris ne oriatur indignatio super filios Israhel
⁶ ego dedi vobis fratres vestros Levitas de medio filiorum Israhel et tradidi donum Domino ut serviant in ministeriis tabernaculi eius
⁷ tu autem et filii tui custodite sacerdotium vestrum et omnia quae ad cultum altaris pertinent et intra velum sunt per sacerdotes administrabuntur si quis externus accesserit occidetur
⁸ locutus est Dominus ad Aaron ecce dedi tibi custodiam primitiarum mearum omnia quae sanctificantur a filiis Israhel tibi tradidi et filiis tuis pro officio sacerdotali legitima sempiterna
⁹ haec ergo accipies de his quae sanctificantur et oblata sunt Domino omnis oblatio et sacrificium et quicquid pro peccato atque delicto redditur mihi et cedet in sancta sanctorum tuum erit et filiorum tuorum
¹⁰ in sanctuario comedes illud mares tantum edent ex eo quia consecratum est tibi
¹¹ primitias autem quas voverint et obtulerint filii Israhel tibi dedi et filiis ac filiabus tuis iure perpetuo qui mundus est in domo tua vescetur eis
¹² omnem medullam olei et vini ac frumenti quicquid offerunt primitiarum Domino tibi dedi
¹³ universa frugum initia quas gignit humus et Domino deportantur cedent in usus tuos qui mundus est in domo tua vescetur eis
¹⁴ omne quod ex voto reddiderint filii Israhel tuum erit
¹⁵ quicquid primum erumpet e vulva cunctae carnis quam offerunt Domino sive ex hominibus sive de pecoribus fuerit tui iuris erit ita dumtaxat ut pro hominis primogenito pretium accipias et omne animal quod inmundum est redimi facias
¹⁶ cuius redemptio erit post unum mensem siclis argenti quinque pondere sanctuarii siclus viginti obolos habet
¹⁷ primogenitum autem bovis et ovis et caprae non facies redimi quia sanctificata sunt Domino sanguinem tantum eorum fundes super altare et adipem adolebis in suavissimum odorem Domino
¹⁸ carnes vero in usum tuum cedent sicut pectusculum consecratum et armus dexter tua erunt
¹⁹ omnes primitias sanctuarii quas offerunt filii Israhel Domino tibi dedi et filiis ac filiabus

tuis iure perpetuo pactum salis est sempiternum coram Domino tibi ac filiis tuis

²⁰ dixitque Dominus ad Aaron in terra eorum nihil possidebitis nec habebitis partem inter eos ego pars et hereditas tua in medio filiorum Israhel

²¹ filiis autem Levi dedi omnes decimas Israhelis in possessionem pro ministerio quo serviunt mihi in tabernaculo foederis

²² ut non accedant ultra filii Israhel ad tabernaculum nec committant peccatum mortiferum

²³ solis filiis Levi mihi in tabernaculo servientibus et portantibus peccata populi legitimum sempiternum erit in generationibus vestris nihil aliud possidebunt

²⁴ decimarum oblatione contenti quas in usus eorum et necessaria separavi

²⁵ locutusque est Dominus ad Mosen dicens

²⁶ praecipe Levitis atque denuntia cum acceperitis a filiis Israhel decimas quas dedi vobis primitias earum offerte Domino id est decimam partem decimae

²⁷ ut reputetur vobis in oblationem primitivorum tam de areis quam de torcularibus

²⁸ et universis quorum accipitis primitias offerte Domino et date Aaron sacerdoti

²⁹ omnia quae offertis ex decimis et in donaria Domini separatis optima et electa erunt

³⁰ dicesque ad eos si praeclara et meliora quaeque obtuleritis ex decimis reputabitur vobis quasi de area et torculari dederitis primitias

³¹ et comedetis eas in omnibus locis vestris tam vos quam familiae vestrae quia pretium est pro ministerio quo servitis in tabernaculo testimonii

³² et non peccabitis super hoc egregia vobis et pingua reservantes ne polluatis oblationes filiorum Israhel et moriamini

CAPITULUM 19

Locutusque est Dominus ad Mosen et Aaron dicens

² ista est religio victimae quam constituit Dominus praecipe filiis Israhel ut adducant ad te vaccam rufam aetatis integrae in qua nulla sit macula nec portaverit iugum

³ tradetisque eam Eleazaro sacerdoti qui eductam extra castra immolabit in conspectu omnium

⁴ et tinguens digitum in sanguine eius asperget contra fores tabernaculi septem vicibus

⁵ conburetque eam cunctis videntibus tam pelle et carnibus eius quam sanguine et fimo flammae traditis

⁶ lignum quoque cedrinum et hysopum coccumque bis tinctum sacerdos mittet in flammam quae vaccam vorat

⁷ et tunc demum lotis vestibus et corpore suo ingredietur in castra commaculatusque erit usque ad vesperam

⁸ sed et ille qui conbuserit eam lavabit vestimenta sua et corpus et inmundus erit usque ad vesperam

⁹ colliget autem vir mundus cineres vaccae et effundet eos extra castra in loco purissimo ut sint multitudini filiorum Israhel in custodiam et in aquam aspersionis quia pro peccato vacca conbusta est

¹⁰ cumque laverit qui vaccae portaverat cineres vestimenta sua inmundus erit usque ad vesperum habebunt hoc filii Israhel et advenae qui habitant inter eos sanctum iure perpetuo

¹¹ qui tetigerit cadaver hominis et propter hoc septem diebus fuerit inmundus

- ¹² aspergetur ex hac aqua die tertio et septimo et sic mundabitur si die tertio aspersus non fuerit septimo non poterit emundari
- ¹³ omnis qui tetigerit humanae animae morticinum et aspersus hac commixtione non fuerit polluet tabernaculum Domini et peribit ex Israhel quia aqua expiationis non est aspersus immundus erit et manebit spurcitia eius super eum
- ¹⁴ ista est lex hominis qui moritur in tabernaculo omnes qui ingrediuntur tentorium illius et universa vasa quae ibi sunt polluta erunt septem diebus
- ¹⁵ vas quod non habuerit operculum nec ligaturam desuper immundum erit
- ¹⁶ si quis in agro tetigerit cadaver occisi hominis aut per se mortui sive os illius vel sepulchrum immundus erit septem diebus
- ¹⁷ tollent de cineribus combustionis atque peccati et mittent aquas vivas super eos in vas
- ¹⁸ in quibus cum homo mundus tinxerit hysopum asperget eo omne tentorium et cunctam supellectilem et homines huiuscemodi contagione pollutos
- ¹⁹ atque hoc modo mundus lustrabit immundum tertio et septimo die expiatusque die septimo lavabit et se et vestimenta sua et mundus erit ad vesperam
- ²⁰ si quis hoc ritu non fuerit expiatus peribit anima illius de medio ecclesiae quia sanctuarium Domini polluit et non est aqua lustrationis aspersus
- ²¹ erit hoc praeceptum legitimum sempiternum ipse quoque qui aspergit aquas lavabit vestimenta sua omnis qui tetigerit aquas expiationis immundus erit usque ad vesperam
- ²² quicquid tetigerit immundus immundum faciet et anima quae horum quippiam tetigerit immunda erit usque ad vesperum

CAPITULUM 20

- V**eneruntque filii Israhel et omnis multitudo in desertum Sin mense primo et mansit populus in Cades mortuaque est ibi Maria et sepulta in eodem loco
- ² cumque indigeret aqua populus coierunt adversum Mosen et Aaron
- ³ et versi in seditionem dixerunt utinam perissemus inter fratres nostros coram Domino
- ⁴ cur eduxistis ecclesiam Domini in solitudinem ut et nos et nostra iumenta moriantur
- ⁵ quare nos fecistis ascendere de Aegypto et adduxistis in locum istum pessimum qui seri non potest qui nec ficum gignit nec vineas nec mala granata insuper et aquam non habet ad bibendum
- ⁶ ingressusque Moses et Aaron dimissa multitudo tabernaculum foederis corruerunt proni in terram et apparuit gloria Domini super eos
- ⁷ locutusque est Dominus ad Mosen dicens
- ⁸ tolle virgam et congrega populum tu et Aaron frater tuus et loquimini ad petram coram eis et illa dabit aquas cumque eduxeris aquam de petra bibet omnis multitudo et iumenta eius
- ⁹ tulit igitur Moses virgam quae erat in conspectu Domini sicut praeceperat ei
- ¹⁰ congregata multitudo ante petram dixitque eis audite rebelles et increduli num de petra hac vobis aquam poterimus eicere
- ¹¹ cumque elevasset Moses manum percutiens virga bis silicem egressae sunt aquae largissimae ita ut et populus biberet et iumenta
- ¹² dixitque Dominus ad Mosen et Aaron quia non credidistis mihi ut sanctificaretis me coram filiis Israhel non introducetis hos populos in terram quam dabo eis
- ¹³ haec est aqua Contradictionis ubi iurgati sunt filii Israhel contra Dominum et

sanctificatus est in eis

14 misit interea nuntios Moses de Cades ad regem Edom qui dicerent haec mandat frater tuus Israhel nosti omnem laborem qui adprehendit nos

15 quomodo descenderint patres nostri in Aegyptum et habitaverimus ibi multo tempore adflixerintque nos Aegyptii et patres nostros

16 et quomodo clamaverimus ad Dominum et exaudierit nos miseritque angelum qui eduxerit nos de Aegypto ecce in urbe Cades quae est in extremis finibus tuis positi

17 obsecramus ut nobis transire liceat per terram tuam non ibimus per agros nec per vineas non bibemus aquas de puteis tuis sed gradiemur via publica nec ad dextram nec ad sinistram declinantes donec transeamus terminos tuos

18 cui respondit Edom non transibis per me alioquin armatus occurram tibi

19 dixeruntque filii Israhel per tritam gradiemur viam et si biberimus aquas tuas nos et pecora nostra dabimus quod iustum est nulla erit in pretio difficultas tantum velociter transeamus

20 at ille respondit non transibis statimque egressus est obuius cum infinita multitudine et manu forti

21 nec voluit adquiescere deprecanti ut concederet transitum per fines suos quam ob rem devertit ab eo Israhel

22 cumque castra movissent de Cades venerunt in montem Or qui est in finibus terrae Edom

23 ubi locutus est Dominus ad Mosen

24 pergat inquit Aaron ad populos suos non enim intrabit terram quam dedi filiis Israhel eo quod incredulus fuerit ori meo ad aquas Contradictionis

25 tolle Aaron et filium eius cum eo et duces eos in montem Or

26 cumque nudaveris patrem veste sua indues ea Eleazarum filium eius et Aaron colligetur et morietur ibi

27 fecit Moses ut praeceperat Dominus et ascenderunt in montem Or coram omni multitudine

28 cumque Aaron spoliasset vestibis suis induit eis Eleazarum filium eius(20:29) illo mortuo in montis supercilio descendit cum Eleazaro

29 (20:30) omnis autem multitudo videns occubuisse Aaron flevit super eo triginta diebus per cunctas familias suas

CAPITULUM 21

Quod cum audisset Chananeus rex Arad qui habitabat ad meridiem venisse scilicet Israhel per exploratorum viam pugnavit contra illum et victor existens duxit ex eo praedam

2 at Israhel voto se Domino obligans ait si tradideris populum istum in manu mea delebo urbes eius

3 exaudivitque Dominus preces Israhel et tradidit Chananeum quem ille interfecit subversis urbibus eius et vocavit nomen loci illius Horma id est anathema

4 profecti sunt autem et de monte Or per viam quae ducit ad mare Rubrum ut circumirent terram Edom et taedere coepit populum itineris ac laboris

5 locutusque contra Deum et Mosen ait cur eduxisti nos de Aegypto ut moreremur in solitudine deest panis non sunt aquae anima nostra iam nausiat super cibo isto levissimo

6 quam ob rem misit Dominus in populum ignitos serpentes ad quorum plagas et mortes

plurimorum

⁷ venerunt ad Mosen atque dixerunt peccavimus quia locuti sumus contra Dominum et te ora ut tollat a nobis serpentes oravit Moses pro populo

⁸ et locutus est Dominus ad eum fac serpentem et pone eum pro signo qui percussus aspexerit eum vivet

⁹ fecit ergo Moses serpentem aeneum et posuit pro signo quem cum percussi aspicerent sanabantur

¹⁰ profectique filii Israhel castrametati sunt in Oboth

¹¹ unde egressi fixere tentoria in Hieabarim in solitudine quae respicit Moab contra orientalem plagam

¹² et inde moventes venerunt ad torrentem Zared

¹³ quem relinquentes castrametati sunt contra Arnon quae est in deserto et prominet in finibus Amorrei siquidem Arnon terminus est Moab dividens Moabitas et Amorreos

¹⁴ unde dicitur in libro bellorum Domini sicut fecit in mari Rubro sic faciet in torrentibus Arnon

¹⁵ scopuli torrentium inclinati sunt ut requiescerent in Ar et recumberent in finibus Moabitarum

¹⁶ ex eo loco apparuit puteus super quo locutus est Dominus ad Mosen congrega populum et dabo ei aquam

¹⁷ tunc cecinit Israhel carmen istud ascendat puteus concinebant

¹⁸ puteus quem foderunt principes et paraverunt duces multitudinis in datore legis et in baculis suis de solitudine Matthana

¹⁹ de Matthana Nahalihel de Nahalihel in Bamoth

²⁰ de Bamoth vallis est in regione Moab in vertice Phasga et quod respicit contra desertum

²¹ misit autem Israhel nuntios ad Seon regem Amorreorum dicens

²² obsecro ut transire mihi liceat per terram tuam non declinabimus in agros et vineas non bibemus aquas ex puteis via regia gradiemur donec transeamus terminos tuos

²³ qui concedere noluit ut transiret Israhel per fines suos quin potius exercitu congregato egressus est obviam in desertum et venit in Iasa pugnavitque contra eum

²⁴ a quo percussus est in ore gladii et possessa est terra eius ab Arnon usque Iebboc et filios Ammon quia forti praesidio tenebantur termini Ammanitarum

²⁵ tulit ergo Israhel omnes civitates eius et habitavit in urbibus Amorrei in Esebon scilicet et viculis eius

²⁶ urbs Esebon fuit regis Seon Amorrei qui pugnavit contra regem Moab et tulit omnem terram quae dicionis illius fuerat usque Arnon

²⁷ idcirco dicitur in proverbio venite in Esebon aedificetur et construatur civitas Seon

²⁸ ignis egressus est de Esebon flamma de oppido Seon et devoravit Ar Moabitarum et habitatores excelsorum Arnon

²⁹ vae tibi Moab peristi popule Chamos dedit filios eius in fugam et filias in captivitatem regi Amorreorum Seon

³⁰ iugum ipsorum disperiit ab Esebon usque Dibon lassii pervenerunt in Nophe et usque Medaba

³¹ habitavit itaque Israhel in terra Amorrei

³² misitque Moses qui explorarent lazer cuius ceperunt viculos et possederunt habitatores

³³ verteruntque se et ascenderunt per viam Basan et occurrit eis Og rex Basan cum omni

populo suo pugnaturus in Edrai

³⁴ dixitque Dominus ad Moisen ne timeas eum quia in manu tua tradidi illum et omnem populum ac terram eius faciesque illi sicut fecisti Seon regi Amorreorum habitatori Esebon

³⁵ percusserunt igitur et hunc cum filiis suis universumque populum eius usque ad internicionem et possederunt terram illius

CAPITULUM 22

profectique castrametati sunt in campestribus Moab ubi trans Iordanem Hierichus sita est

² videns autem Balac filius Sepphor omnia quae fecerat Israhel Amorreo

³ et quod pertimuissent eum Moabitae et impetum eius ferre non possent

⁴ dixit ad maiores natu Madian ita delebit hic populus omnes qui in nostris finibus commorantur quomodo solet bos herbas usque ad radices carpere ipse erat eo tempore rex in Moab

⁵ misit ergo nuntios ad Balaam filium Beor ariolum qui habitabat super flumen terrae filiorum Ammon ut vocarent eum et dicerent ecce egressus est populus ex Aegypto qui operuit superficiem terrae sedens contra me

⁶ veni igitur et maledic populo huic quia fortior me est si quo modo possim percutere et eicere eum de terra mea novi enim quod benedictus sit cui benedixeris et maledictus in quem maledicta congesseris

⁷ perrexerunt seniores Moab et maiores natu Madian habentes divinationis pretium in manibus cumque venissent ad Balaam et narrassent ei omnia verba Balac

⁸ ille respondit manete hic nocte et respondebo quicquid mihi dixerit Dominus manentibus illis apud Balaam venit Deus et ait ad eum

⁹ quid sibi volunt homines isti apud te

¹⁰ respondit Balac filius Sepphor rex Moabitarum misit ad me

¹¹ dicens ecce populus qui egressus est de Aegypto operuit superficiem terrae veni et maledic ei si quo modo possim pugnans abicere eum

¹² dixitque Deus ad Balaam noli ire cum eis neque maledicas populo quia benedictus est

¹³ qui mane consurgens dixit ad principes ite in terram vestram quia prohibuit me Deus venire vobiscum

¹⁴ reversi principes dixerunt ad Balac noluit Balaam venire nobiscum

¹⁵ rursum ille multo plures et nobiliores quam ante miserat misit

¹⁶ qui cum venissent ad Balaam dixerunt sic dicit Balac filius Sepphor ne cuncteris venire ad me

¹⁷ paratum honorare te et quicquid volueris dare veni et maledic populo isti

¹⁸ respondit Balaam si dederit mihi Balac plenam domum suam argenti et auri non potero inmutare verbum Domini Dei mei ut vel plus vel minus loquar

¹⁹ obsecro ut hic maneatis etiam hac nocte et scire queam quid mihi rursum respondeat Dominus

²⁰ venit ergo Deus ad Balaam nocte et ait ei si vocare te venerunt homines isti surge et vade cum eis ita dumtaxat ut quod tibi praecepero facias

²¹ surrexit Balaam mane et strata asina profectus est cum eis

²² et iratus est Deus stetitque angelus Domini in via contra Balaam qui sedebat asinae et duos pueros habebat secum

²³ cernens asina angelum stantem in via evaginato gladio avertit se de itinere et ibat per agrum quam cum verberaret Balaam et vellet ad semitam reducere

²⁴ stetit angelus in angustiis duarum maceriarum quibus vineae cingebantur

²⁵ quem videns asina iunxit se parieti et adtrivit sedentis pedem at ille iterum verberabat

²⁶ et nihilominus angelus ad locum angustum transiens ubi nec ad dextram nec ad sinistram poterat deviari obvius stetit

²⁷ cumque vidisset asina stantem angelum concidit sub pedibus sedentis qui iratus vehementius caedebat fuste latera

²⁸ aperuitque Dominus os asinae et locuta est quid feci tibi cur percutis me ecce iam tertio

²⁹ respondit Balaam quia commeruisti et inlusisti mihi utinam haberem gladium ut te percuterem

³⁰ dixit asina nonne animal tuum sum cui semper sedere consuesti usque in praesentem diem dic quid simile umquam fecerim tibi at ille ait numquam

³¹ protinus aperuit Dominus oculos Balaam et vidit angelum stantem in via evaginato gladio adoravitque eum pronus in terram

³² cui angelus cur inquit tertio verberas asinam tuam ego veni ut adversarer tibi quia perversa est via tua mihiq̄ue contraria

³³ et nisi asina declinasset de via dans locum resistenti te occidissem et illa viveret

³⁴ dixit Balaam peccavi nesciens quod tu stares contra me et nunc si displicet tibi ut vadam revertar

³⁵ ait angelus vade cum istis et cave ne aliud quam praecepero tibi loquaris ivit igitur cum principibus

³⁶ quod cum audisset Balac egressus est in occursum eius in oppido Moabitarum quod situm est in extremis finibus Arnon

³⁷ dixitque ad Balaam misi nuntios ut vocarent te cur non statim venisti ad me an quia mercedem adventui tuo reddere nequeo

³⁸ cui ille respondit ecce adsum numquid loqui potero aliud nisi quod Deus posuerit in ore meo

³⁹ perrexerunt ergo simul et venerunt in urbem quae in extremis regni eius finibus erat

⁴⁰ cumque occidisset Balac boves et oves misit ad Balaam et principes qui cum eo erant munera

⁴¹ mane autem facto duxit eum ad excelsa Baal et intuitus est extremam partem populi

CAPITULUM 23

dixitque Balaam ad Balac aedifica mihi hic septem aras et para totidem vitulos eiusdemque numeri arietes

² cumque fecisset iuxta sermonem Balaam inposuerunt simul vitulum et arietem super aram

³ dixitque Balaam ad Balac sta paulisper iuxta holocaustum tuum donec vadam si forte occurrat mihi Dominus et quodcumque imperaverit loquar tibi

⁴ cumque abisset velociter occurrit ei Deus locutusque ad eum Balaam septem inquit aras erexi et inposui vitulum et arietem desuper

⁵ Dominus autem posuit verbum in ore eius et ait revertere ad Balac et haec loqueris

⁶ reversus invenit stantem Balac iuxta holocaustum suum et omnes principes Moabitarum

- ⁷ adsumptaue parabola sua dixit de Aram adduxit me Balac rex Moabitarum de montibus orientis veni inquit et maledic Iacob propera et detestare Israhel
- ⁸ quomodo maledicam cui non maledixit Deus qua ratione detester quem Dominus non detestatur
- ⁹ de summis silicibus videbo eum et de collibus considerabo illum populus solus habitabit et inter gentes non reputabitur
- ¹⁰ quis dinumerare possit pulverem Iacob et nosse numerum stirpis Israhel moriatur anima mea morte iustorum et fiant novissima mea horum similia
- ¹¹ dixitque Balac ad Balaam quid est hoc quod agis ut malediceres inimicis vocavi te et tu e contrario benedicis eis
- ¹² cui ille respondit num aliud possum loqui nisi quod iusserit Dominus
- ¹³ dixit ergo Balac veni mecum in alterum locum unde partem Israhelis videas et totum videre non possis inde maledicito ei
- ¹⁴ cumque duxisset eum in locum sublimem super verticem montis Phasga aedificavit Balaam septem aras et inpositis supra vitulo atque ariete
- ¹⁵ dixit ad Balac sta hic iuxta holocaustum tuum donec ego pergam obuius
- ¹⁶ cui cum Dominus occurrisset posuissetque verbum in ore eius ait revertere ad Balac et haec loqueris ei
- ¹⁷ reversus invenit eum stantem iuxta holocaustum suum et principes Moabitarum cum eo ad quem Balac quid inquit locutus est Dominus
- ¹⁸ at ille adsumpta parabola sua ait sta Balac et ausculta audi fili Sepphor
- ¹⁹ non est Deus quasi homo ut mentiatur nec ut filius hominis ut mutetur dixit ergo et non faciet locutus est et non implebit
- ²⁰ ad benedicendum adductus sum benedictionem prohibere non valeo
- ²¹ non est idolum in Iacob nec videtur simulacrum in Israhel Dominus Deus eius cum eo est et clangor victoriae regis in illo
- ²² Deus eduxit eum de Aegypto cuius fortitudo similis est rinocerotis
- ²³ non est augurium in Iacob nec divinatio in Israhel temporibus suis dicetur Iacob et Israheli quid operatus sit Deus
- ²⁴ ecce populus ut leaena consurget et quasi leo erigetur non accubabit donec devoret praedam et occisorum sanguinem bibat
- ²⁵ dixitque Balac ad Balaam nec maledicas ei nec benedicas
- ²⁶ et ille nonne ait dixi tibi quod quicquid mihi Deus imperaret hoc facerem
- ²⁷ et ait Balac ad eum veni et ducam te ad alium locum si forte placeat Deo ut inde maledicas eis
- ²⁸ cumque duxisset eum super verticem montis Phogor qui respicit solitudinem
- ²⁹ dixit ei Balaam aedifica mihi hic septem aras et para totidem vitulos eiusdemque numeri arietes
- ³⁰ fecit Balac ut Balaam dixerat inposuitque vitulos et arietes per singulas aras

CAPITULUM 24

Cumque vidisset Balaam quod placeret Domino ut benediceret Israheli nequaquam abiit ut ante perrexerat ut augurium quaereret sed dirigens contra desertum vultum suum

² et elevans oculos vidit Israhel in tentoriis commorantem per tribus suas et inruente in se

spiritu Dei

³ adsumpta parabola ait dixit Balaam filius Beor dixit homo cuius obturatus est oculus

⁴ dixit auditor sermonum Dei qui visionem Omnipotentis intuitus est qui cadit et sic aperiuntur oculi eius

⁵ quam pulchra tabernacula tua Iacob et tentoria tua Israel

⁶ ut valles nemorosae ut horti iuxta fluvios inrigui ut tabernacula quae fixit Dominus quasi cedri propter aquas

⁷ fluet aqua de situla eius et semen illius erit in aquas multas tolletur propter Agag rex eius et auferetur regnum illius

⁸ Deus eduxit illum de Aegypto cuius fortitudo similis est rinocerotis devorabunt gentes hostes illius ossaque eorum confringent et perforabunt sagittis

⁹ accubans dormivit ut leo et quasi leaena quam suscitare nullus audebit qui benedixerit tibi erit ipse benedictus qui maledixerit in maledictione reputabitur

¹⁰ iratusque Balac contra Balaam conplosis manibus ait ad maledicendum inimicis meis vocavi te quibus e contrario tertio benedixisti

¹¹ revertere ad locum tuum decreveram quidem magnifice honorare te sed Dominus privavit te honore disposito

¹² respondit Balaam ad Balac nonne nuntiis tuis quos misisti ad me dixi

¹³ si dederit mihi Balac plenam domum suam argenti et auri non potero praeterire sermonem Domini Dei mei ut vel boni quid vel mali proferam ex corde meo sed quicquid Dominus dixerit hoc loquar

¹⁴ verumtamen pergens ad populum meum dabo consilium quid populus tuus huic populo faciat extremo tempore

¹⁵ sumpta igitur parabola rursum ait dixit Balaam filius Beor dixit homo cuius obturatus est oculus

¹⁶ dixit auditor sermonum Dei qui novit doctrinam Altissimi et visiones Omnipotentis videt qui cadens apertos habet oculos

¹⁷ videbo eum sed non modo intuebor illum sed non prope orietur stella ex Iacob et consurget virga de Israel et percutiet duces Moab vastabitque omnes filios Seth

¹⁸ et erit Idumea possessio eius hereditas Seir cedet inimicis suis Israel vero fortiter aget

¹⁹ de Iacob erit qui dominetur et perdat reliquias civitatis

²⁰ cumque vidisset Amalech adsumens parabolam ait principium gentium Amalech cuius extrema perdentur

²¹ vidit quoque Cineum et adsumpta parabola ait robustum est quidem habitaculum tuum sed si in petra posueris nidum tuum

²² et fueris electus de stirpe Cain quamdiu poteris permanere Assur enim capiet te

²³ adsumptaque parabola iterum locutus est heu quis victurus est quando ista faciet Deus

²⁴ venient in trieribus de Italia superabunt Assyrios vastabuntque Hebraeos et ad extremum etiam ipsi peribunt

²⁵ surrexitque Balaam et reversus est in locum suum Balac quoque via qua venerat rediit

CAPITULUM 25

morabatur autem eo tempore Israhel in Setthim et fornicatus est populus cum filiabus Moab

² quae vocaverunt eos ad sacrificia sua at illi comederunt et adoraverunt deos earum

³ initiatusque est Israhel Beelphegor et iratus Dominus

⁴ ait ad Mosen tolle cunctos principes populi et suspende eos contra solem in patibulis ut avertatur furor meus ab Israhel

⁵ dixitque Moses ad iudices Israhel occidat unusquisque proximos suos qui initiati sunt Beelphegor

⁶ et ecce unus de filiis Israhel intravit coram fratribus suis ad scortum madianitin vidente Mose et omni turba filiorum Israhel qui flebant ante fores tabernaculi

⁷ quod cum vidisset Finees filius Eleazari filii Aaron sacerdotis surrexit de medio multitudinis et arrepto pugione

⁸ ingressus est post virum israhelitem in lupanar et perfodit ambos simul virum scilicet et mulierem in locis genitalibus cessavitque plaga a filiis Israhel

⁹ et occisi sunt viginti quattuor milia homines

¹⁰ dixitque Dominus ad Mosen

¹¹ Finees filius Eleazari filii Aaron sacerdotis avertit iram meam a filiis Israhel quia zelo meo commotus est contra eos ut non ipse delerem filios Israhel in zelo meo

¹² idcirco loquere ad eos ecce do ei pacem foederis mei

¹³ et erit tam ipsi quam semini illius pactum sacerdotii sempiternum quia zelatus est pro Deo suo et expiavit scelus filiorum Israhel

¹⁴ erat autem nomen viri israhelitae qui occisus est cum Madianitide Zambri filius Salu dux de cognatione et tribu Symeonis

¹⁵ porro mulier madianitis quae pariter interfecta est vocabatur Chozbi filia Sur principis nobilissimi Madianitarum

¹⁶ locutusque est Dominus ad Mosen dicens

¹⁷ hostes vos sentiant Madianitae et percutite eos

¹⁸ quia et ipsi hostiliter egerunt contra vos et decipere insidiis per idolum Phogor et Chozbi filiam ducis Madian sororem suam quae percussa est in die plagae pro sacrilegio Phogor

CAPITULUM 26

postquam noxiorum sanguis effusus est dixit Dominus ad Mosen et Eleazarum filium Aaron sacerdotem

² numerate omnem summam filiorum Israhel a viginti annis et supra per domos et cognationes suas cunctos qui possunt ad bella procedere

³ locuti sunt itaque Moses et Eleazar sacerdos in campestribus Moab super Iordanem contra Hierichum ad eos qui erant

⁴ a viginti annis et supra sicut Dominus imperarat quorum iste est numerus

⁵ Ruben primogenitus Israhel huius filius Enoch a quo familia Enochitarum et Phallu a quo familia Phalluitarum

⁶ et Esrom a quo familia Esromitarum et Charmi a quo familia Charmitarum

⁷ hae sunt familiae de stirpe Ruben quarum numerus inventus est quadraginta tria milia et septingenti triginta

⁸ filius Phallu Heliab

⁹ huius filii Namuhel et Dathan et Abiram isti sunt Dathan et Abiram principes populi qui surrexerunt contra Mosen et Aaron in seditione Core quando adversum Dominum rebellaverunt

¹⁰ et aperiens terra os suum devoravit Core morientibus plurimis quando conbusit ignis ducentos quinquaginta viros et factum est grande miraculum

¹¹ ut Core pereunte filii illius non perirent

¹² filii Symeon per cognationes suas Namuhel ab hoc familia Namuhelitarum lamin ab hoc familia laminitarum lachin ab hoc familia lachinitarum

¹³ Zare ab hoc familia Zareitarum Saul ab hoc familia Saulitarum

¹⁴ hae sunt familiae de stirpe Symeon quarum omnis numerus fuit viginti duo milia ducentorum

¹⁵ filii Gad per cognationes suas Sephon ab hoc familia Sephonitarum Aggi ab hoc familia Aggitarum Suni ab hoc familia Sunitarum

¹⁶ Ozni ab hoc familia Oznitarum Heri ab hoc familia Heritarum

¹⁷ Arod ab hoc familia Aroditarum Arihel ab hoc familia Arihelitarum

¹⁸ istae sunt familiae Gad quarum omnis numerus fuit quadraginta milia quingentorum

¹⁹ filii Iuda Her et Onan qui ambo mortui sunt in terra Chanaan

²⁰ fueruntque filii Iuda per cognationes suas Sela a quo familia Selanitarum Phares a quo familia Pharesitarum Zare a quo familia Zareitarum

²¹ porro filii Phares Esrom a quo familia Esromitarum et Amul a quo familia Amulitarum

²² istae sunt familiae Iuda quarum omnis numerus fuit septuaginta milia quingentorum

²³ filii Isachar per cognationes suas Thola a quo familia Tholaitarum Phua a quo familia Phuitarum

²⁴ Iasub a quo familia Iasubitarum Semran a quo familia Semranitarum

²⁵ hae sunt cognationes Isachar quarum numerus fuit sexaginta quattuor milia trecentorum

²⁶ filii Zabulon per cognationes suas Sared a quo familia Sareditarum Helon a quo familia Helonitarum lalel a quo familia lalelitarum

²⁷ hae sunt cognationes Zabulon quarum numerus fuit sexaginta milia quingentorum

²⁸ filii Ioseph per cognationes suas Manasse et Ephraim

²⁹ de Manasse ortus est Machir a quo familia Machiritarum Machir genuit Galaad a quo familia Galaaditarum

³⁰ Galaad habuit filios Hiezer a quo familia Hiezeritarum et Elec a quo familia Elecarum

³¹ et Asrihel a quo familia Asrihelitarum et Sechem a quo familia Sechemitarum

³² et Semida a quo familia Semidatarum et Ephraim a quo familia Ephraimitarum

³³ fuit autem Ephraim pater Salphaad qui filios non habebat sed tantum filias quarum ista sunt nomina Maala et Noa et Egla et Melcha et Thersa

³⁴ hae sunt familiae Manasse et numerus earum quinquaginta duo milia septingentorum

³⁵ filii autem Ephraim per cognationes suas fuerunt hii Suthala a quo familia Suthalitarum Becher a quo familia Becheritarum Tehen a quo familia Tehenitarum

³⁶ porro filius Suthala fuit Heran a quo familia Heranitarum

³⁷ hae sunt cognationes filiorum Ephraim quarum numerus triginta duo milia quingentorum

³⁸ isti sunt filii Ioseph per familias suas filii Benjamin in cognationibus suis Bale a quo familia Baleitarum Azbel a quo familia Azbelitarum Ahiram a quo familia Ahiramitarum

³⁹ Supham a quo familia Suphamitarum Hupham a quo familia Huphamitarum
⁴⁰ filii Bale Hered et Noeman de Hered familia Hereditarum de Noeman familia Noemitarum
⁴¹ hii sunt filii Benjamin per cognationes suas quorum numerus quadraginta quinque milia sescentorum
⁴² filii Dan per cognationes suas Suham a quo familia Suhamitarum hae cognationes Dan per familias suas
⁴³ omnes fuere Suhamitae quorum numerus erat sexaginta quattuor milia quadringentorum
⁴⁴ filii Aser per cognationes suas lemna a quo familia lemnaitarum lessui a quo familia lessuitarum Brie a quo familia Brieitarum
⁴⁵ filii Brie Haber a quo familia Haberitarum et Melchihel a quo familia Melchihelitarum
⁴⁶ nomen autem filiae Aser fuit Sara
⁴⁷ hae cognationes filiorum Aser et numerus eorum quinquaginta tria milia quadringentorum
⁴⁸ filii Nepthalim per cognationes suas lessihel a quo familia lessihelitarum Guni a quo familia Gunitarum
⁴⁹ lesser a quo familia lesseritarum Sellem a quo familia Sellemitarum
⁵⁰ hae sunt cognationes filiorum Nepthalim per familias suas quorum numerus quadraginta quinque milia quadringentorum
⁵¹ ista est summa filiorum Israhel qui recensiti sunt sescenta milia et mille septingenti triginta
⁵² locutusque est Dominus ad Mosen dicens
⁵³ istis dividetur terra iuxta numerum vocabulorum in possessiones suas
⁵⁴ pluribus maiorem partem dabis et paucioribus minorem singulis sicut nunc recensiti sunt tradetur possessio
⁵⁵ ita dumtaxat ut sors terram tribubus dividat et familiis
⁵⁶ quicquid sorte contigerit hoc vel plures accipient vel pauciores
⁵⁷ hic quoque est numerus filiorum Levi per familias suas Gerson a quo familia Gersonitarum Caath a quo familia Caathitarum Merari a quo familia Meraritarum
⁵⁸ hae sunt familiae Levi familia Lobni familia Hebroni familia Mooli familia Musi familia Cori at vero Caath genuit Amram
⁵⁹ qui habuit uxorem lochabed filiam Levi quae nata est ei in Aegypto haec genuit viro suo Amram filios Aaron et Mosen et Mariam sororem eorum
⁶⁰ de Aaron orti sunt Nadab et Abiu et Eleazar et Ithamar
⁶¹ quorum Nadab et Abiu mortui sunt cum obtulissent ignem alienum coram Domino
⁶² fueruntque omnes qui numerati sunt viginti tria milia generis masculini ab uno mense et supra quia non sunt recensiti inter filios Israhel nec eis cum ceteris data possessio
⁶³ hic est numerus filiorum Israhel qui descripti sunt a Mosen et Eleazaro sacerdote in campestribus Moab supra Iordanem contra Hiericho
⁶⁴ inter quos nullus fuit eorum qui ante numerati sunt a Mose et Aaron in deserto Sinai
⁶⁵ praedixerat enim Dominus quod omnes morerentur in solitudine nullusque remansit ex eis nisi Chaleb filius Iepphonne et Iosue filius Nun

CAPITULUM 27

accesserunt autem filiae Salphaad filii Ephraim filii Galaad filii Machir filii Manasse qui fuit filius Ioseph quarum sunt nomina Maala et Noa et Egla et Melcha et Thersa

² steteruntque coram Mosen et Eleazaro sacerdote et cunctis principibus populi ad ostium tabernaculi foederis atque dixerunt

³ pater noster mortuus est in deserto nec fuit in seditione quae concitata est contra Dominum sub Core sed in peccato suo mortuus est hic non habuit mares filios cur tollitur nomen illius de familia sua quia non habet filium date nobis possessionem inter cognatos patris nostri

⁴ rettulitque Moses causam earum ad iudicium Domini

⁵ qui dixit ad eum

⁶ iustam rem postulant filiae Salphaad da eis possessionem inter cognatos patris sui et ei in hereditate succedant

⁷ ad filios autem Israhel loqueris haec

⁸ homo cum mortuus fuerit absque filio ad filiam eius transibit hereditas

⁹ si filiam non habuerit habebit successores fratres suos

¹⁰ quod si et fratres non fuerint dabitur hereditatem fratribus patris eius

¹¹ sin autem nec patruos habuerit dabitur hereditas his qui ei proximi sunt eritque hoc filiis Israhel sanctum lege perpetua sicut praecepit Dominus Mosi

¹² dixit quoque Dominus ad Mosen ascende in montem istum Abarim et contemplare inde terram quam daturus sum filiis Israhel

¹³ cumque videris eam ibis et tu ad populum tuum sicut ivit frater tuus Aaron

¹⁴ quia offendistis me in deserto Sin in contradictione multitudinis nec sanctificare me voluistis coram ea super aquas hae sunt aquae Contradictionis in Cades deserti Sin

¹⁵ cui respondit Moses

¹⁶ provideat Dominus Deus spirituum omnis carnis hominem qui sit super multitudinem hanc

¹⁷ et possit exire et intrare ante eos et educere illos vel introducere ne sit populus Domini sicut oves absque pastore

¹⁸ dixitque Dominus ad eum tolle Iosue filium Nun virum in quo est spiritus et pone manum tuam super eum

¹⁹ qui stabit coram Eleazaro sacerdote et omni multitudine

²⁰ et dabis ei praecepta cunctis videntibus et partem gloriae tuae ut audiat eum omnis synagoga filiorum Israhel

²¹ pro hoc si quid agendum erit Eleazar sacerdos consulat Dominum ad verbum eius egredietur et ingredietur ipse et omnes filii Israhel cum eo et cetera multitudo

²² fecit Moses ut praeceperat Dominus cumque tulisset Iosue statuit eum coram Eleazaro sacerdote et omni frequentia populi

²³ et inpositis capiti eius manibus cuncta replicavit quae mandaverat Dominus

CAPITULUM 28

dixit quoque Dominus ad Mosen

- ² praecipe filiis Israhel et dices ad eos oblationem meam et panes et incensum odoris suavissimi offerte per tempora sua
- ³ haec sunt sacrificia quae offerre debetis agnos anniculos immaculatos duos cotidie in

holocaustum sempiternum

⁴ unum offeretis mane et alterum ad vesperam

⁵ decimam partem oephi similiae quae conspersa sit oleo purissimo et habeat quartam partem hin

⁶ holocaustum iuge est quod obtulistis in monte Sinai in odorem suavissimum incensi Domini

⁷ et libabitis vini quartam partem hin per agnos singulos in sanctuario Domini

⁸ alterumque agnum similiter offeretis ad vesperam iuxta omnem ritum sacrificii matutini et libamentorum eius oblationem suavissimi odoris Domino

⁹ die autem sabbati offeretis duos agnos anniculos immaculatos et duas decimas similiae oleo conspersae in sacrificio et liba

¹⁰ quae rite funduntur per singula sabbata in holocausto sempiterno

¹¹ in kalendis autem id est in mensuum exordiis offeretis holocaustum Domino vitulos de armento duos arietem unum agnos anniculos septem immaculatos

¹² et tres decimas similiae oleo conspersae in sacrificio per singulos vitulos et duas decimas similiae oleo conspersae per singulos arietes

¹³ et decimam decimae similiae ex oleo in sacrificio per agnos singulos holocaustum suavissimi odoris atque incensi est Domino

¹⁴ libamenta autem vini quae per singulas fundenda sunt victimas ista erunt media pars hin per vitulos singulos tertia per arietem quarta per agnum hoc erit holocaustum per omnes menses qui sibi anno vertente succedunt

¹⁵ hircus quoque offeretur Domino pro peccatis in holocaustum sempiternum cum libamentis suis

¹⁶ mense autem primo quartadecima die mensis phase Domini erit

¹⁷ et quintadecima die sollemnitas septem diebus vescentur azymis

¹⁸ quarum dies prima venerabilis et sancta erit omne opus servile non facietis in ea

¹⁹ offeretisque incensum holocaustum Domino vitulos de armento duos arietem unum agnos anniculos immaculatos septem

²⁰ et sacrificia singulorum ex simila quae conspersa sit oleo tres decimas per singulos vitulos et duas decimas per arietem

²¹ et decimam decimae per agnos singulos id est per septem agnos

²² et hircum pro peccato unum ut expietur pro vobis

²³ praeter holocaustum matutinum quod semper offertis

²⁴ ita facietis per singulos dies septem dierum in fomitem ignis et in odorem suavissimum Domino qui surget de holocausto et de libationibus singulorum

²⁵ dies quoque septimus celeberrimus et sanctus erit vobis omne opus servile non facietis in eo

²⁶ dies etiam primitivorum quando offertis novas fruges Domino expletis ebdomadibus venerabilis et sancta erit omne opus servile non facietis in ea

²⁷ offeretisque holocaustum in odorem suavissimum Domino vitulos de armento duos arietem unum et agnos anniculos immaculatos septem

²⁸ atque in sacrificiis eorum similiae oleo conspersae tres decimas per singulos vitulos per arietes duas

- ²⁹ per agnos decimam decimae qui simul sunt agni septem hircum quoque
³⁰ qui mactatur pro expiatione praeter holocaustum sempiternum et liba eius
³¹ immaculata offeretis omnia cum libationibus suis

CAPITULUM 29

mensis etiam septimi prima dies venerabilis et sancta erit vobis omne opus servile non facietis in ea quia dies clangoris est et tubarum

- ² offeretisque holocaustum in odorem suavissimum Domino vitulum de armento unum arietem unum agnos anniculos immaculatos septem
³ et in sacrificiis eorum similiae oleo conspersae tres decimas per singulos vitulos duas decimas per arietem
⁴ unam decimam per agnum qui simul sunt agni septem
⁵ et hircum pro peccato qui offertur in expiationem populi
⁶ praeter holocaustum kalendarum cum sacrificiis suis et holocaustum sempiternum cum libationibus solitis hisdem caerimoniis offeretis in odorem suavissimum incensum Domino
⁷ decima quoque dies mensis huius septimi erit vobis sancta atque venerabilis et adfligetis animas vestras omne opus servile non facietis in ea
⁸ offeretisque holocaustum Domino in odorem suavissimum vitulum de armento unum arietem unum agnos anniculos immaculatos septem
⁹ et in sacrificiis eorum similiae oleo conspersae tres decimas per vitulos singulos duas decimas per arietem
¹⁰ decimam decimae per agnos singulos qui sunt simul septem agni
¹¹ et hircum pro peccato absque his quae offerri pro delicto solent in expiationem et holocaustum sempiternum in sacrificio et libaminibus eorum
¹² quintadecima vero die mensis septimi quae vobis erit sancta atque venerabilis omne opus servile non facietis in ea sed celebrabitis sollemnitatem Domino septem diebus
¹³ offeretisque holocaustum in odorem suavissimum Domino vitulos de armento tredecim arietes duos agnos anniculos quattuordecim immaculatos
¹⁴ et in libamentis eorum similiae oleo conspersae tres decimas per vitulos singulos qui sunt simul vituli tredecim et duas decimas aieti uno id est simul arietibus duobus
¹⁵ et decimam decimae agnis singulis qui sunt simul agni quattuordecim
¹⁶ et hircum pro peccato absque holocausto sempiterno et sacrificio et libamine eius
¹⁷ in die altero offeres vitulos de armento duodecim arietes duos agnos anniculos immaculatos quattuordecim
¹⁸ sacrificiaque et libamina singulorum per vitulos et arietes et agnos rite celebrabis
¹⁹ et hircum pro peccato absque holocausto sempiterno sacrificioque eius et libamine
²⁰ die tertio offeres vitulos undecim arietes duos agnos anniculos immaculatos quattuordecim
²¹ sacrificiaque et libamina singulorum per vitulos et arietes et agnos rite celebrabis
²² et hircum pro peccato absque holocausto sempiterno et sacrificio et libamine eius
²³ die quarto offeres vitulos decem arietes duos agnos anniculos immaculatos quattuordecim
²⁴ sacrificiaque eorum et libamina singulorum per vitulos et arietes et agnos rite celebrabis
²⁵ et hircum pro peccato absque holocausto sempiterno sacrificioque eius et libamine

²⁶ die quinto offeres vitulos novem arietes duos agnos anniculos immaculatos quattuordecim
²⁷ sacrificiaque et libamina singulorum per vitulos et arietes et agnos rite celebrabis
²⁸ et hircum pro peccato absque holocausto sempiterno sacrificioque eius et libamine
²⁹ die sexto offeres vitulos octo arietes duos agnos anniculos immaculatos quattuordecim
³⁰ sacrificiaque et libamina singulorum per vitulos et arietes et agnos rite celebrabis
³¹ et hircum pro peccato absque holocausto sempiterno sacrificioque eius et libamine
³² die septimo offeres vitulos septem arietes duos agnos anniculos immaculatos quattuordecim
³³ sacrificiaque et libamina singulorum per vitulos et arietes et agnos rite celebrabis
³⁴ et hircum pro peccato absque holocausto sempiterno sacrificioque eius et libamine
³⁵ die octavo qui est celeberrimus omne opus servile non facietis
³⁶ offerentes holocaustum in odorem suavissimum Domino vitulum unum arietem unum agnos anniculos immaculatos septem
³⁷ sacrificiaque et libamina singulorum per vitulos et arietes et agnos rite celebrabis
³⁸ et hircum pro peccato absque holocausto sempiterno sacrificioque eius et libamine
³⁹ haec offeretis Domino in sollemnitatibus vestris praeter vota et oblationes spontaneas in holocausto in sacrificio in libamine et in hostiis pacificis
⁴⁰ (30:1) narravitque Moses filiis Israhel omnia quae ei Dominus imperarat

CAPITULUM 30

(30:2)

Et locutus est ad principes tribuum filiorum Israhel iste est sermo quem praecepit Dominus

² (30:3) si quis virorum votum Domino voverit aut se constrinxerit iuramento non faciet irritum verbum suum sed omne quod promisit implebit

³ (30:4) mulier si quippiam voverit et se constrinxerit iuramento quae est in domo patris sui et in aetate adhuc puellari si cognoverit pater votum quod pollicita est et iuramentum quo obligavit animam suam et tacuerit voti rea erit

⁴ (30:5) quicquid pollicita est et iuravit opere conplebit

⁵ (30:6) sin autem statim ut audierit contradixerit pater et vota et iuramenta eius irrita erunt nec obnoxia tenebitur sponsioni eo quod contradixerit pater

⁶ (30:7) si maritum habuerit et voverit aliquid et semel verbum de ore eius egrediens animam illius obligaverit iuramento

⁷ (30:8) quo die audierit vir et non contradixerit voti rea erit reddet quodcumque promiserat

⁸ (30:9) sin autem audiens statim contradixerit et irritas fecerit pollicitationes eius verbaque quibus obstrinxerat animam suam propitius ei erit Dominus

⁹ (30:10) vidua et repudiata quicquid voverint reddent

¹⁰ (30:11) uxor in domo viri cum se voto constrinxerit et iuramento

¹¹ (30:12) si audierit vir et tacuerit nec contradixerit sponsioni reddet quodcumque promiserat

¹² (30:13) sin autem extemplo contradixerit non tenebitur promissionis rea quia maritus contradixit et Dominus ei propitius erit

- ¹³ (30:14) si voverit et iuramento se constrinxerit ut per ieiunium vel ceterarum rerum abstinentiam adfligat animam suam in arbitrio viri erit ut faciat sive non faciat
- ¹⁴ (30:15) quod si audiens vir tacuerit et in alteram diem distulerit sententiam quicquid voverat atque promiserat reddet quia statim ut audivit tacuit
- ¹⁵ (30:16) sin autem contradixerit postquam rescivit portabit ipse iniquitatem eius
- ¹⁶ (30:17) istae sunt leges quas constituit Dominus Mosi inter virum et uxorem inter patrem et filiam quae in puellari adhuc aetate est vel quae manet in parentis domo

CAPITULUM 31

- L**ocutusque est Dominus ad Mosen dicens
- ² ulciscere prius filios Israhel de Madianitis et sic colligeris ad populum tuum
- ³ statimque Moses armate inquit ex vobis viros ad pugnam qui possint ultionem Domini expetere de Madianitis
- ⁴ mille viri de singulis tribubus eligantur Israhel qui mittantur ad bellum
- ⁵ dederuntque millenos de cunctis tribubus id est duodecim milia expeditorum ad pugnam
- ⁶ quos misit Moses cum Finees filio Eleazari sacerdotis vasa quoque sancta et tubas ad clangendum tradidit ei
- ⁷ cumque pugnassent contra Madianitas atque vicissent omnes mares occiderunt
- ⁸ et reges eorum Evi et Recem et Sur et Ur et Rebe quinque principes gentis Balaam quoque filium Beor interfecerunt gladio
- ⁹ ceperuntque mulieres eorum et parvulos omniaque pecora et cunctam supellectilem quicquid habere potuerant depopulati sunt
- ¹⁰ tam urbes quam viculos et castella flamma consumpsit
- ¹¹ et tulerunt praedam et universa quae ceperant tam ex hominibus quam ex iumentis
- ¹² et adduxerunt ad Mosen et Eleazarum sacerdotem et ad omnem multitudinem filiorum Israhel reliqua etiam utensilia portaverunt ad castra in campestribus Moab iuxta Iordanem contra Hiericho
- ¹³ egressi sunt autem Moses et Eleazar sacerdos et omnes principes synagogae in occursum eorum extra castra
- ¹⁴ iratusque Moses principibus exercitus tribunis et centurionibus qui venerant de bello
- ¹⁵ ait cur feminas reservastis
- ¹⁶ nonne istae sunt quae deceperunt filios Israhel ad suggestionem Balaam et praevaricari vos fecerunt in Domino super peccato Phogor unde et percussus est populus
- ¹⁷ ergo cunctos interficite quicquid est generis masculini etiam in parvulis et mulieres quae noverunt viros in coitu iugulate
- ¹⁸ puellas autem et omnes feminas virgines servate vobis
- ¹⁹ et manete extra castra septem diebus qui occiderit hominem vel occisum tetigerit lustrabitur die tertio et septimo
- ²⁰ et de omni praeda sive vestimentum fuerit sive vas et aliquid in utensilia praeparatum de caprarum pellibus et pilis et ligno expiabitur
- ²¹ Eleazar quoque sacerdos ad viros exercitus qui pugnaverant sic locutus est hoc est praeceptum legis quod mandavit Dominus Mosi
- ²² aurum et argentum et aes et ferrum et stagnum et plumbum
- ²³ et omne quod potest transire per flammam igne purgabitur quicquid autem ignem non

potest sustinere aqua expiationis sanctificabitur

24 et lavabitis vestimenta vestra die septimo et purificati postea castra intrabitis

25 dixitque Dominus ad Mosen

26 tollite summam eorum quae capta sunt ab homine usque ad pecus tu et Eleazar sacerdos et principes vulgi

27 dividesque ex aequo praedam inter eos qui pugnaverunt et egressi sunt ad bellum et inter omnem reliquam multitudinem

28 et separabis partem Domino ab his qui pugnaverunt et fuerunt in bello unam animam de quingentis tam ex hominibus quam ex bubus et asinis et ovibus

29 et dabis eam Eleazaro sacerdoti quia primitiae Domini sunt

30 ex media quoque parte filiorum Israhel accipies quinquagesimum caput hominum et boum et asinorum et ovium cunctarumque animantium et dabis ea Levitis qui excubant in custodiis tabernaculi Domini

31 feceruntque Moses et Eleazar sicut praeceperat Dominus

32 fuit autem praeda quam exercitus ceperat ovium sescenta septuaginta quinque milia

33 boum septuaginta duo milia

34 asinorum sexaginta milia et mille

35 animae hominum sexus feminei quae non cognoverant viros triginta duo milia

36 dataque est media pars his qui in proelio fuerant ovium trecenta triginta septem milia quingenta

37 e quibus in partem Domini supputatae sunt oves sescentae septuaginta quinque

38 et de bubus triginta sex milibus boves septuaginta duo

39 de asinis triginta milibus quingentis asini sexaginta unus

40 de animabus hominum sedecim milibus cesserunt in partem Domini triginta duae animae

41 tradiditque Moses numerum primitiarum Domini Eleazaro sacerdoti sicut ei fuerat imperatum

42 ex media parte filiorum Israhel quam separaverat his qui in proelio fuerant

43 de media vero parte quae contigerat reliquae multitudini id est de ovium trecentis triginta septem milibus quingentis

44 et de bubus triginta sex milibus

45 et de asinis triginta milibus quingentis

46 et de hominibus sedecim milibus

47 tulit Moses quinquagesimum caput et dedit Levitis qui excubant in tabernaculo Domini sicut praeceperat Dominus

48 cumque accessissent principes exercitus ad Mosen et tribuni centurionesque dixerunt

49 nos servi tui recensuimus numerum pugnatorum quos habuimus sub manu nostra et ne unus quidem defuit

50 ob hanc causam offerimus in donariis Domini singuli quod in praeda auri potuimus invenire periscelides et armillas anulos et dextralia ac murenulas ut deprecetur pro nobis Dominum

51 susceperuntque Moses et Eleazar sacerdos omne aurum in diversis speciebus

52 pondo sedecim milia septingentos quinquaginta siclos a tribunis et centurionibus

⁵³ unusquisque enim quod in praeda rapuerat suum erat
⁵⁴ et susceptum intulerunt in tabernaculum testimonii in monumentum filiorum Israhel coram Domino

CAPITULUM 32

filii autem Ruben et Gad habebant pecora multa et erat illis in iumentis infinita substantia cumque vidissent Iazer et Galaad aptas alendis animalibus
² venerunt ad Mosen et ad Eleazarum sacerdotem et principes multitudinis atque dixerunt
³ Atharoth et Dibon et Iazer et Nemra Esbon et Eleale et Sabam et Nebo et Beon
⁴ terram quam percussit Dominus in conspectu filiorum Israhel regionis uberrimae est ad pastum animalium et nos servi tui habemus iumenta plurima
⁵ precamurque si invenimus gratiam coram te ut des nobis famulis tuis eam in possessionem ne facias nos transire Iordanem
⁶ quibus respondit Moses numquid fratres vestri ibunt ad pugnam et vos hic sedebitis
⁷ cur subvertitis mentes filiorum Israhel ne transire audeant in locum quem eis daturus est Dominus
⁸ nonne ita egerunt patres vestri quando misi de Cadesbarne ad explorandam terram
⁹ cumque venissent usque ad vallem Botri lustrata omni regione subverterunt cor filiorum Israhel ut non intrarent fines quos eis Dominus dedit
¹⁰ qui iratus iuravit dicens
¹¹ si videbunt homines isti qui ascenderunt ex Aegypto a viginti annis et supra terram quam sub iuramento pollicitus sum Abraham Isaac et Iacob et noluerunt sequi me
¹² praeter Chaleb filium Iepphone Cenezeum et Iosue filium Nun isti impleverunt voluntatem meam
¹³ iratusque Dominus adversum Israhel circumduxit eum per desertum quadraginta annis donec consumeretur universa generatio quae fecerat malum in conspectu eius
¹⁴ et ecce inquit vos surrexistis pro patribus vestris incrementa et alumni hominum peccatorum ut augetis furorem Domini contra Israhel
¹⁵ qui si nolueritis sequi eum in solitudine populum derelinquet et vos causa eritis necis omnium
¹⁶ at illi prope accedentes dixerunt caulas ovium fabricabimus et stabula iumentorum parvulis quoque nostris urbes munitas
¹⁷ nos autem ipsi armati et accincti pergemus ad proelium ante filios Israhel donec introducamus eos ad loca sua parvuli nostri et quicquid habere possumus erunt in urbibus muratis propter habitatorum insidias
¹⁸ non revertemur in domos nostras usquequo possideant filii Israhel hereditatem suam
¹⁹ nec quicquam quaeremus trans Iordanem quia iam habemus possessionem nostram in orientali eius plaga
²⁰ quibus Moses ait si facitis quod promittitis expediti pergite coram Domino ad pugnam
²¹ et omnis vir bellator armatus Iordanem transeat donec subvertat Dominus inimicos suos
²² et subiciatur ei omnis terra tunc eritis inculpabiles et apud Dominum et apud Israhel et obtinebitis regiones quas vultis coram Domino
²³ sin autem quod dicitis non feceritis nulli dubium quin peccetis in Dominum et scitote

quoniam peccatum vestrum adprehendet vos

²⁴ aedificate ergo urbes parvulis vestris et caulas ac stabula ovibus ac iumentis et quod polliciti estis implete

²⁵ dixeruntque filii Gad et Ruben ad Mosen servi tui sumus faciemus quod iubet dominus noster

²⁶ parvulos nostros et mulieres et pecora ac iumenta relinquemus in urbibus Galaad

²⁷ nos autem famuli tui omnes expediti pergemus ad bellum sicut tu domine loqueris

²⁸ praecepit ergo Moses Eleazaro sacerdoti et Iosue filio Nun et principibus familiarum per tribus Israhel et dixit ad eos

²⁹ si transierint filii Gad et filii Ruben vobiscum Iordanem omnes armati ad bellum coram Domino et vobis fuerit terra subiecta date eis Galaad in possessionem

³⁰ sin autem noluerint transire vobiscum in terram Chanaan inter vos habitandi accipiant loca

³¹ responderuntque filii Gad et filii Ruben sicut locutus est Dominus servis suis ita faciemus

³² ipsi armati pergemus coram Domino in terram Chanaan et possessionem iam suscepisse nos confitemur trans Iordanem

³³ dedit itaque Moses filiis Gad et Ruben et dimidia tribui Manasse filii Ioseph regnum Seon regis Amorrei et regnum Og regis Basan et terram eorum cum urbibus suis per circuitum

³⁴ igitur extruxerunt filii Gad Dibon et Atharoth et Aroer

³⁵ Etrothsophan et Iazer Iecbaa

³⁶ et Bethnemra et Betharan urbes munitas et caulas pecoribus suis

³⁷ filii vero Ruben aedificaverunt Esbon et Eleale et Cariathaim

³⁸ et Nabo et Baalmeon versis nominibus Sabama quoque inponentes vocabula urbibus quas extruxerant

³⁹ porro filii Machir filii Manasse perrexerunt in Galaad et vastaverunt eam interfecto Amorreo habitatore eius

⁴⁰ dedit ergo Moses terram Galaad Machir filio Manasse qui habitavit in ea

⁴¹ Iair autem filius Manasse abiit et occupavit vicos eius quos appellavit Avothiair id est villas Iair

⁴² Nobe quoque perrexit et adprehendit Canath cum viculis suis vocavitque eam ex nomine suo Nobe

CAPITULUM 33

hae sunt mansiones filiorum Israhel qui egressi sunt de Aegypto per turmas suas in manu Mosi et Aaron

² quas descripsit Moses iuxta castrorum loca quae Domini iussione mutabant

³ profecti igitur de Ramesse mense primo quintadecima die mensis primi altera die phase filii Israhel in manu excelsa videntibus cunctis Aegyptiis

⁴ et sepelientibus primogenitos quos percusserat Dominus nam et in diis eorum exercuerat ultionem

⁵ castrametati sunt in Soccoth

⁶ et de Soccoth venerunt in Aetham quae est in extremis finibus solitudinis

⁷ inde egressi venerunt contra Phiahiroth quae respicit Beelsephon et castrametati sunt ante Magdolum

⁸ profectique de Phiahiroth transierunt per medium mare in solitudinem et ambulantes tribus diebus per desertum Aetham castrametati sunt in Mara

⁹ profectique de Mara venerunt in Helim ubi erant duodecim fontes aquarum et palmae septuaginta ibique castrametati sunt

¹⁰ sed et inde egressi fixere tentoria super mare Rubrum profectique de mari Rubro

¹¹ castrametati sunt in deserto Sin

¹² unde egressi venerunt in Dephca

¹³ profectique de Dephca castrametati sunt in Alus

¹⁴ egressi de Alus Raphidim fixere tentoria ubi aqua populo defuit ad bibendum

¹⁵ profectique de Raphidim castrametati sunt in deserto Sinai

¹⁶ sed et de solitudine Sinai egressi venerunt ad sepulchra Concupiscentiae

¹⁷ profectique de sepulchris Concupiscentiae castrametati sunt in Aseroth

¹⁸ et de Aseroth venerunt in Rethma

¹⁹ profectique de Rethma castrametati sunt in Remmonphares

²⁰ unde egressi venerunt in Lebna

²¹ et de Lebna castrametati sunt in Ressa

²² egressi de Ressa venerunt in Ceelatha

²³ unde profecti castrametati sunt in monte Sepher

²⁴ egressi de monte Sepher venerunt in Arada

²⁵ inde proficiscentes castrametati sunt in Maceloth

²⁶ profectique de Maceloth venerunt in Thaath

²⁷ de Thaath castrametati sunt in Thare

²⁸ unde egressi fixerunt tentoria in Methca

²⁹ et de Methca castrametati sunt in Esmona

³⁰ profectique de Esmona venerunt in Moseroth

³¹ et de Moseroth castrametati sunt in Baneiacan

³² egressique de Baneiacan venerunt in montem Gadgad

³³ unde profecti castrametati sunt in Hietebatha

³⁴ et de Hietebatha venerunt in Ebrona

³⁵ egressique de Ebrona castrametati sunt in Asiongaber

³⁶ inde profecti venerunt in desertum Sin haec est Cades

³⁷ egressique de Cades castrametati sunt in monte Hor in extremis finibus terrae Edom

³⁸ ascenditque Aaron sacerdos montem Hor iubente Domino et ibi mortuus est anno quadragesimo egressionis filiorum Israhel ex Aegypto mense quinto prima die mensis

³⁹ cum esset annorum centum viginti trium

⁴⁰ audivitque Chananeus rex Arad qui habitabat ad meridiem in terra Chanaan venisse filios Israhel

⁴¹ et profecti de monte Hor castrametati sunt in Salmona

⁴² unde egressi venerunt in Phinon

⁴³ profectique de Phinon castrametati sunt in Oboth

⁴⁴ et de Oboth venerunt in Ieabarim quae est in finibus Moabitarum

⁴⁵ profectique de Ieabarim fixere tentoria in Dibongad

- ⁴⁶ unde egressi castrametati sunt in Elmondeblathaim
- ⁴⁷ egressi de Elmondeblathaim venerunt ad montes Abarim contra Nabo
- ⁴⁸ profectique de montibus Abarim transierunt ad campestria Moab super Iordanem contra Hiericho
- ⁴⁹ ibique castrametati sunt de Bethsimon usque ad Belsattim in planioribus locis Moabitarum
- ⁵⁰ ubi locutus est Dominus ad Mosen
- ⁵¹ praecipe filiis Israhel et dic ad eos quando transieritis Iordanem intrantes terram Chanaan
- ⁵² disperdite cunctos habitatores regionis illius confringite titulos et statuas comminuite atque omnia excelsa vastate
- ⁵³ mundantes terram et habitantes in ea ego enim dedi vobis illam in possessionem
- ⁵⁴ quam dividetis vobis sorte pluribus dabitur latiore et paucis angustiore singulis ut sors ceciderit ita tribuetur hereditas per tribus et familias possessio dividetur
- ⁵⁵ sin autem nolueritis interficere habitatores terrae qui remanserint erunt vobis quasi clavi in oculis et lanceae in lateribus et adversabuntur vobis in terra habitationis vestrae
- ⁵⁶ et quicquid illis facere cogitarem vobis faciam

CAPITULUM 34

- I**locutus est Dominus ad Mosen
- ² praecipe filiis Israhel et dices ad eos cum ingressi fueritis terram Chanaan et in possessionem vobis sorte ceciderit his finibus terminabitur
- ³ pars meridiana incipiet a solitudine Sin quae est iuxta Edom et habebit terminos contra orientem mare Salsissimum
- ⁴ qui circumibunt australem plagam per ascensum Scorpionis ita ut transeant Senna et perveniant in meridiem usque ad Cadesbarne unde egredientur confinia ad villam nomine Addar et tendent usque Asemona
- ⁵ ibique per gyrum terminus ab Asemona usque ad torrentem Aegypti et maris Magni litore finietur
- ⁶ plaga autem occidentalis a mari Magno incipiet et ipso fine cludetur
- ⁷ porro ad septentrionalem plagam a mari Magno termini incipient pervenientes usque ad montem Altissimum
- ⁸ a quo venies in Emath usque ad terminos Sedada
- ⁹ ibuntque confinia usque Zephrona et villam Henan hii erunt termini in parte aquilonis
- ¹⁰ inde metabuntur fines contra orientalem plagam de villa Henan usque Sephama
- ¹¹ et de Sephama descendunt termini in Rebla contra fontem inde pervenient contra orientem ad mare Chenereth
- ¹² et tendent usque Iordanem et ad ultimum Salsissimo cludentur mari hanc habebitis terram per fines suos in circuitu
- ¹³ praecepitque Moses filiis Israhel dicens haec erit terra quam possidebitis sorte et quam iussit dari Dominus novem tribubus et dimidia tribui
- ¹⁴ tribus enim filiorum Ruben per familias suas et tribus filiorum Gad iuxta cognationum numerum media quoque tribus Manasse
- ¹⁵ id est duae semis tribus acceperunt partem suam trans Iordanem contra Hiericho ad

orientalem plagam

¹⁶ et ait Dominus ad Mosen

¹⁷ haec sunt nomina virorum qui terram vobis dividant Eleazar sacerdos et Iosue filius Nun

¹⁸ et singuli principes de tribubus singulis

¹⁹ quorum ista sunt vocabula de tribu Iuda Chaleb filius Iepphon

²⁰ de tribu Symeon Samuhel filius Ammiud

²¹ de tribu Benjamin Helidad filius Chaselon

²² de tribu filiorum Dan Bocci filius Iogli

²³ filiorum Ioseph de tribu Manasse Hannihel filius Ephod

²⁴ de tribu Ephraim Camuhel filius Sephtan

²⁵ de tribu Zabulon Elisaphan filius Pharnach

²⁶ de tribu Isachar dux Faltihel filius Ozan

²⁷ de tribu Aser Ahiud filius Salomi

²⁸ de tribu Nephtali Phedahel filius Ameiud

²⁹ hii sunt quibus praecepit Dominus ut dividerent filiis Israhel terram Chanaan

CAPITULUM 35

haec quoque locutus est Dominus ad Mosen in campesribus Moab super Iordanem contra Hiericho

² praecepe filiis Israhel ut dent Levitis de possessionibus suis

³ urbes ad habitandum et suburbana earum per circuitum ut ipsi in oppidis maneant et suburbana sint pecoribus ac iumentis

⁴ quae a muris civitatum forinsecus per circuitum mille passuum spatio tendentur

⁵ contra orientem duo milia erunt cubiti et contra meridiem similiter duo milia ad mare quoque quod respicit occidentem eadem mensura erit et septentrionalis plaga aequali termino finietur eruntque urbes in medio et foris suburbana

⁶ de ipsis autem oppidis quae Levitis dabitur sex erunt in fugitivorum auxilia separata ut fugiat ad ea qui fuderit sanguinem exceptis his alia quadraginta duo oppida

⁷ id est simul quadraginta octo cum suburbanis suis

⁸ ipsaeque urbes quae dabuntur de possessionibus filiorum Israhel ab his qui plus habent plures auferentur et qui minus pauciores singuli iuxta mensuram hereditatis suae dabunt oppida Levitis

⁹ ait Dominus ad Mosen

¹⁰ loquere filiis Israhel et dices ad eos quando transgressi fueritis Iordanem in terram Chanaan

¹¹ decernite quae urbes esse debeant in praesidia fugitivorum qui nolentes sanguinem fuderint

¹² in quibus cum fuerit profugus cognatus occisi eum non poterit occidere donec stet in conspectu multitudinis et causa illius iudicetur

¹³ de ipsis autem urbibus quae ad fugitivorum subsidia separantur

¹⁴ tres erunt trans Iordanem et tres in terra Chanaan

¹⁵ tam filiis Israhel quam advenis atque peregrinis ut confugiat ad eas qui nolens sanguinem fuderit

¹⁶ si quis ferro percusserit et mortuus fuerit qui percussus est reus erit homicidii et ipse morietur
¹⁷ si lapidem iecerit et ictus occubuerit similiter punietur
¹⁸ si ligno percussus interierit percussoris sanguine vindicabitur
¹⁹ propinquus occisi homicidam interficiet statim ut adprehenderit eum percutiet
²⁰ si per odium quis hominem inpulerit vel iecerit quippiam in eum per insidias
²¹ aut cum esset inimicus manu percusserit et ille mortuus fuerit percussor homicidii reus erit cognatus occisi statim ut invenerit eum iugulabit
²² quod si fortuito et absque odio
²³ et inimicitiiis quicquam horum fecerit
²⁴ et hoc audiente populo fuerit conprobatum atque inter percussorem et propinquum sanguinis quaestio ventilata
²⁵ liberabitur innocens de ultoris manu et reducetur per sententiam in urbem ad quam confugerat manebitque ibi donec sacerdos magnus qui oleo sancto unctus est moriatur
²⁶ si interfector extra fines urbium quae exulibus deputatae sunt
²⁷ fuerit inventus et percussus ab eo qui ultor est sanguinis absque noxa erit qui eum occiderit
²⁸ debuerat enim profugus usque ad mortem pontificis in urbe residere postquam autem ille obierit homicida revertetur in terram suam
²⁹ haec sempiterna erunt et legitima in cunctis habitationibus vestris
³⁰ homicida sub testibus punietur ad unius testimonium nullus condemnabitur
³¹ non accipietis pretium ab eo qui reus est sanguinis statim et ipse morietur
³² exules et profugi ante mortem pontificis nullo modo in urbes suas reverti poterunt
³³ ne polluatis terram habitationis vestrae quae insontium cruore maculatur nec aliter expiari potest nisi per eius sanguinem qui alterius sanguinem fuderit
³⁴ atque ita emundabitur vestra possessio me commorante vobiscum ego enim sum Dominus qui habito inter filios Israhel

CAPITULUM 36

accesserunt autem et principes familiarum Galaad filii Machir filii Manasse de stirpe filiorum Ioseph locutique sunt Mosi coram principibus Israhel atque dixerunt
² tibi domino nostro praecepit Dominus ut terram sorte divideres filiis Israhel et ut filiabus Salphaad fratris nostri dares possessionem debitam patri
³ quas si alterius tribus homines uxores acceperint sequetur possessio sua et translata ad aliam tribum de nostra hereditate minuetur
⁴ atque ita fiet ut cum iobeus id est quinquagesimus annus remissionis advenerit confundatur sortium distributio et aliorum possessio ad alios transeat
⁵ respondit Moses filiis Israhel et Domino praecipiente ait recte tribus filiorum Ioseph locuta est
⁶ et haec lex super filiabus Salphaad a Domino promulgata est nubant quibus volunt tantum ut suae tribus hominibus
⁷ ne commisceatur possessio filiorum Israhel de tribu in tribum omnes enim viri ducent uxores de tribu et cognatione sua
⁸ et cunctae feminae maritos de eadem tribu accipient ut hereditas permaneat in familiis

⁹ nec sibi misceantur tribus sed ita maneant

¹⁰ ut a Domino separatae sunt feceruntque filiae Salphaad ut fuerat imperatum

¹¹ et nupserunt Maala et Thersa et Egla et Melcha et Noa filiis patris sui

¹² de familia Manasse qui fuit filius Ioseph et possessio quae illis fuerat adtributa mansit in tribu et familia patris earum

¹³ haec sunt mandata atque iudicia quae praecepit Dominus per manum Mosi ad filios Israhel in campesribus Moab super Iordanem contra Hiericho

For other languages please go to **www.wordproject.org**